

T 9155/1141.2(3)
CHINESE-JAPANESE LIBRARY
HARVARD-YENCHING INSTITUTE
AT HARVARD UNIVERSITY
APR 15 1952

03

Made in Japan

居易錄卷九

濟南 王士禛

著



邾世家一卷雜采春秋及三傳國語爲之年表一卷起己未周平王四十九年魯隱公元年終癸酉周元王八年魯哀公二十七年凡二百五十五年會盟戰伐之蹟具焉其自序以爲以邾繫魯以魯繫周以周繫天元末朱右作也右字伯賢臨海人洪武初預修元史官至晉府長史有白雲集

梁溪門人秦道然言倪元鎮故居今爲祇陀寺在無錫縣東南二十里所謂雲林堂清閼閣故址皆在寺

至今猶多梧桐梁溪有潘氏者與元鎮友善家藏其
真蹟甚富今亦散在人間矣元鎮之族今爲郟世以
貨殖貲雄里中士人甚少其家有元鎮寫真上有張
伯雨楊廉夫柯敬仲輩題贊具存

元制左右詹事正二品太子詹事從二品翰林學士
承旨同副詹事正三品翰林學士知制誥修國史集
賢學士同國子祭酒從三品翰林集賢侍讀侍講學
士同太子中庶子中允左右諭德正四品翰林集賢
直學士俱從四品翰林集賢待制國史國子司業俱
正五品翰林集賢修撰從六品翰林國史院編修官

檢閱官正八品

元制御史大夫正二品御史中丞從二品六部尚書
正三品侍御史六部侍郎正四品給事中同修起居
注知登聞鼓院同治書侍御史正五品監察御史殿
中侍御史正七品

避暑錄云劉原父集百七十五卷貢父集五十卷

庚午順天鄉試考試官翰林院侍講學士王揆編修
魏希徵同考試官知縣何訥等十五人舊例順天鄉
試考試官例用編修檢討皆史官也武試則用侍讀

侍講

康熙戊午武鄉試予以侍讀爲
正主考官侍講韓公元少副考

特用講學防揣摩也同考

例用京官員外郎主事中書舍人行人等官用外官
自是科始

都察院爲臺員內陞外轉事奉 旨常翼聖着內陞李時謙着外轉

安南志二十卷安南人內附元奉議大夫僉歸化路宣撫司事黎崩字景高撰曰漢交州九真日南刺史太守三國時制守唐安南都督都護經略使交愛驩三州刺史趙氏世家五代時僭竊丁氏世家黎氏世家李氏世家陳氏世家郡邑山川學校官制章服刑政兵制人物物產之類悉具有察罕程鉅夫元明善

龍仁夫歐陽玄許有壬序則自序一通未有敘事述家世官階及內附顛末甚詳

安南志第十八卷載安南人詩皆近體內附安南國公善樂老人山園云不是文公逃晉難庶幾微子慨殷亾大明殿侍宴云雍容湛露歌詩什彷彿鈞天入夢魂還國云幾年去國杳雲沙身寄狹鞍暫到家簇簇樓臺空日影盈盈珠翠各天涯真成東海歸遼鶴敢望南門入鄭蛇人物淒涼何處問江風吹老荔支花送天使張顯卿云四方專對詩三百五嶺歸來路八千陳聖王挽宋臣陳仲微云無端天上編年月不

管人間有死生萬疊白雲遮故國一堆黃壤蓋香名
陳仁王竹林大士饋天使張顯卿春餅云柘枝舞罷
試春衫況直今朝三月三紅雪雕盤春菜餅從來風
俗舊安南和喬元朗云馬頭風雪重回首眼底江山
小駐驂陳英王送天使李景山云五嶺山高入未度
三湘水闊雁先歸老國叔昭明王樂道先生贈天使
柴莊卿李振云北闕衣冠爭祖道南州草木盡知名
內附封輔義公陳粹山登岳陽樓云烏沉谷口千林
暝龍戰波心六月寒安撫使賴益歸賡叅議許公東
山飄然樓詩云秋興亭前月上時滿樓山色索題詩

心如柳絮沾泥早身似蓮花出水遲經卷已輸居士
樂酒尊宜與可人期倚闌看遍郎湖景塵俗紛紛總
不知前詩尤有佳句內附中朝一統有今日南國
小臣如此江喜詔云黃雞催曉唱玲瓏尺五飛來紫
禁中遂使堯言布天下始知漢詔感山東侍宴云元
年新紀黃龍瑞重譯今傳白雉來都城云寒盡苑花
初著蕊春深宮柳已藏鴉重九懷張憲使云猶思馬
上西門哭不記螯邊左手持贈趙郎中云梅花南北
路篁竹短長亭送侍郎智子元云桂林南去接交州
柳葉桄榔暗驛樓使者持書臨絕域侍郎鞭馬照清

秋元年詔下黃龍漢九譯人歸白雉周便化文身作
章甫歸來陸賈說前旒送傅與礪云滄海龍飛天子
詔青冥鶴下趙王臺諸溪篁竹叅差動五嶺梅花次
第開用載道韻晚遊郎官湖云鷗邊人立城陰晚柳
外花明水淨時大別山禹栢云神功四載殷周上元
氣一枝天地間題桂林驛云千里鄉心蝴蝶夢一船
秋色鷓鴣聲雖中州士人無以過之

明永樂間胡廣等奉詔撰五經大全皆鈔錄前人成
書竄易其名易則董楷董鼎董真卿詩則劉瑾書則
陳櫟春秋則汪克寬李太宰默續孤樹哀談曾言之

錢武肅王常作金銅佛塔以金萬片聚成之宋姜堯
章嘗得數片其友周文璞爲賦長句所云錢王納土
歸京師流落多在西湖寺者是也今嘉禾白蓮寺尚
藏其一上刻放下屠刀立地成佛公案周箕說

謚法貴一字二字其說不一如歐陽永叔初欲謚文
以配韓退之而常秩增一字爲文忠議者以爲必畱
此以待王安石已而果然朱元晦太常初擬謚文正
上謚也考功劉彌正謂先王當繼唐韓文公宜特謚
曰文詔從之自後周程張呂諸儒遂皆用一字此謚
貴一字也京鏜謚文穆其子沆請避家諱改文忠言

者以爲楊億鉅儒既諡曰文議者欲加一忠字竟不
之與加一字猶不可況二字極美乎此諡貴二字也
二說不知何者爲是

崇禎九年漢中人劉一真入終南山採藥遇仙人自
言是徐元直令一真奏事有旨下撫按察訪成都費
經虞有詩云傳聞徐元直尚在南山雲我欲從之去

高峯樓鹿羣

經禮補逸九卷祁門環谷汪克寬著洪武二年臨江
曾魯序弘治中少詹事程敏政序其書蓋本朱子經
傳通解之意別爲義例以吉凶軍賓嘉爲綱條目甚

晰集儀禮周官大小戴禮易詩書春秋傳孝經家語
及漢儒紀錄凡有合于禮者各著其目列爲五禮其
自序大略如此環谷之學受于雲峰胡炳文可堂吳
仲迂受春秋于嚴陵吳朝陽其祖東山先生華字榮
夫受經于饒雙峰雙峰爲黃勉齋高第弟子勉齋朱
子之門人朱子修三禮以喪祭二禮屬勉齋其淵源
授受如此環溪著書別有春秋纂疏考異左傳分紀
刻于閩綱目考異刻于祁其易傳義音考二十六卷
詩集傳音義會通三十卷周禮類要若干卷四書音
證十卷未刻近門人汪比部懋麟刻環谷集惜未觀

諸書之全

畫繼云李伯時畫多以澄心堂紙爲之不施丹粉不用縑素倪雲林蓋取法于此

蘇叔黨最工畫晁以道誌其墓云書畫之勝克肖似其先人又時出新意作山水遠水多紋依巖多屋木皆人跡絕處並以焦墨爲之此出奇也樂城公嘗稱其孝云

先祖方伯府君晚年嘗懸六賊戲彌陀圖于堂壁先

祭酒府君亦然

在揚州余氏女子
韞珠繡此圖最工

畫繼云燕龍圖曾孫興祖

家有龍圖公忍事敵災星圖命意甚佳但不知若爲

命筆又閩中林退菴尚書歸老子孫請教但云學喫

虧今霸州郝氏自戶侍公傑以學喫虧三字揭堂額

其子恭定公惟訥世守之恭定丁亥進士官至吏部

尚書弟惟謙丙戌舉人監察御史惟諤江西布政使

司叅議惟謙子士鈞戊辰進士翰林院庶吉士弟士

錞舉人戶侍公弟位舉人子惟訓壬辰進士廬州府

推官惟謨癸丑進士內閣中書舍人都人以爲盛德

之報聞 駕至霸州嘗幸其第親見之云

米芾畫史云潁州公庫顧凱之維摩百補是杜牧之

摹寄潁守本精彩照人是小杜亦工畫也又圖畫聞

見志潤州甘露寺有謝靈運畫歷代名畫記宣和畫譜皆不載其名

一說易者廬螻之名蜥蜴是也身色一日十二變易者取其變也彖者豨神之名茅犀是也犀形獨角知幾知祥彖者取其幾也象者大荒之獸人希見之按圖而想其形耳象者取其想也卦者挂物之杙也爻者交疏之牕也卦取其示爻取其交互而旁通也右說殊穿鑿未覩出于何書

華陰宗人弘撰山史博物君子也寄所著十七帖述并注極雋而核述云此帖前人謂皆與周益州者周

名撫字道和永和三年桓溫攻成都李勢降以撫代毋丘奧爲益州刺史進爵建成公征西都護進鎮西將軍在官三十餘年有惠政卒蜀人廟祀之帖中多言蜀事又按淳化帖有一帖云周益州送此印竹杖卿尊長或須此今送則此帖謂是與周者可信而中有數帖非與周語來禽帖宋僧邦詩謂與桓宣武楊用修四川志只載八帖是與周則謂此帖皆是與周者亦不然也帖凡二十有七以第一帖首字名篇故曰十七帖張彥遠法書要錄云十七帖長一丈二尺卽貞觀中內本一百七行九百四十三字是烜赫著

名帖也黃長睿東觀餘論云十七帖多臨本永禪師
虞世南褚庭誨臨字皆不甚遠故書有數本皆不同
南唐李後主勒石澄心堂者乃賀知章臨本宋魏泰
家有硬黃本淳熙祕閣續帖亦有刻淳化帖刻多殘
缺今世所傳雖非皆右軍真蹟然皆出于右軍要皆
不及唐人摹刻弓尾有勅字及解褚勒定者爲佳也
山史工書嘗刻華州郭宗昌金石史家藏漢唐已來
金石文字甚富古文辭亦爛雅康熙己未以博學鴻
儒徵至京師居城西昊天寺不謁貴遊以老病辭不
入試罷歸嘗攜示蘭亭湍流帶右天五字未損本唐

棣水仙圖乞予作長歌同觀者施侍讀愚山也在關
中蓋張芸叟一流人

書家謂索靖有一筆飛白書畫家謂戚文秀畫清濟
灌河圖中有一筆超騰回摺逾五丈通貫于波浪之
間予謂文家亦有此訣唯司馬子長之史韓退之蘇
子瞻之文杜李韓蘇之歌行大篇足以當之

門人嘉善魏坤禹平持水村圖求題予爲作四絕句

云朱竹垞詩云綠蘋不礙板橋樁紅葉常堆老樹腔

他日相過任風雨抽帆直到讀書窓又跋云通川錢
德鈞居魏塘趙承旨爲作水村圖予嘗見其真蹟信

墨寶也禹平以水村自號吳江徐虹亭檢討亦爲作
水村圖予題之云鷗波亭子趙王孫曾爲錢郎畫水
村過眼雲烟難再覩披圖彷彿筆蹤存斜插魚標颺
酒旗柳陰小犬吠笛籬歸田最是汾湖好我亦相期
作釣師旣而禹平復至京師屬李南溟上舍又作此
卷按德鈞當日亦有二圖承旨作之于前薊丘李息
齋爲之于後何古今人事之相類也姜西溟詩云通
志堂前前日見生綃一幅似桃源不知神物歸何處
畱得青衫舊酒痕跋云曾見松雪公水村圖主人零
落此圖遂不可復問矣或云已入祕府予一日入朝

待漏偶與陳說巖大司空談及云曾于大內見松雪
真蹟後有元人題跋甚多蓋卽姜所云也

九月二十三日

上御乾清門召九卿奏事舊例

六部都通大分曹次第上殿是日侍衛傳

旨九

卿一同入奏蓋

上初愈未可久勞也

吳道子畫鍾馗以左手捉鬼右手抉鬼目有得之以
獻蜀主者蜀主甚愛之常張于臥內一日召黃筌曰
若用拇指掐其目愈有力令筌改之筌請歸私室數
日別畫用拇指者并吳畫以獻蜀主問之對曰道子
畫鍾馗一身之力氣色眼貌俱在第二指臣今所畫

一身之力併在拇指以故不敢輒改蜀主嗟賞其言
此雖論畫實文章家要訣也

門人潛江朱載震悔人爲顧舍人貞觀梁汾以竹鑪
卷索詩王舍人孟端物也鑪在惠山聽松菴吳文定
及見之與盛侍郎冰壑賦詩相倡和程篁墩謝文正
倪文毅皆和錢鶴灘跋共爲一卷文正篁墩書甚佳
但詩限于韻亦成弘前風氣然也匏菴紀事云巳亥
之春予過無錫遊惠山入聽松菴觀竹鑪酌第二泉
煮茶嘗賦詩紀其事今刑部侍郎盛公無錫人也謂
鑪出于故王舍人孟端制古而雅乃倣而爲之且自

銘其上其姪虞字舜臣性尤好古來省其伯父不遠
數千里攜以與俱予獲觀焉因取前詩次韻賞之詩
不具錄前有孟端畫山水題云九龍山人王黻爲真
性海上人製上人者聽松菴主僧也卷首有李西涯
篆書竹鑪新詠四大字

同年長洲汪鈍翁琬以庚午十二月十三日卒汪狷
急多忤交友罕善終者雖予以至誠交之亦不免其
齟齬予終不較也海內交知甚多至于議論有根柢
終推此君汪官止翰林編修云

十月朔午門頒賜康熙三十年新曆是日相國真定

梁公招同李容齋大司馬杜肇余大司寇陳說巖大
司空小集蕉林書屋觀黃大癡九峰雪霽圖至正九
年年八十一為班彥功作氣韻深厚神品也又趙松
雪真草千文有袁永之董思白二跋北宋人洛陽耆
英會圖一卷會中十一人圖止八人後書耆英會序
文三橋兄弟跋定為溫公手蹟有延祐二年月日子
昂觀題字

浙江巡撫揭中有地名狗葬不解何義周石公中丞
云秦檜墓也

姜西溟云嘗于吳門董姓家見南唐澄心堂法帖六

冊真祖搨也後三冊歸吳江徐翰林釵電發以八十

金粥之王少宗伯涓來其三冊不知流轉誰氏矣

此帖
吳天

章曾攜示予又有宋
藥器宋奇談一書

又宋刻江西宗派圖圖如年表世系之

例後再過則已亾之矣

西溟家有范中立長江霽雪圖崔白郭索敗葦二圖
又有巫山十二峰英石一長可三尺許奇秀天成後
歸張叅議能鱗

西山清涼寺有無名子題詩甚高古竹垞為予誦之
詩云山僧汲空潭驚起二龍子十里雲冥濛三日雨
不止

宋趙與峕賓退錄云漢世重錢宣帝元康間穀石五錢金城湟中穀斛亦不過八錢惟元帝永光二年歲比不登京師穀石二百餘邊郡四百關東五百而其先初元二年齊饑穀石財三百民已多餓死王莽時黃金一斤直錢萬朱提善銀八兩直錢一千五百八十他銀八兩直一千而已高帝賀呂公給日賀錢萬呂公大驚若今世十千何足驚也惠帝元年民有罪得買爵三十級以免死應劭謂一級直錢二千凡爲錢六萬武帝天漢太始間募死罪入贖錢五十萬減死一等雖數逾惠帝時八倍然後世正使匱乏亦何

肯出此令至成帝鴻嘉中買爵又殺而爲千錢可見當時錢之難得也近自洋銅不至各布政司皆停鼓鑄錢日益貴銀日益賤今歲屢經條奏九卿雜議究無良策卽每銀一兩抵錢一千之令戶部再三申飭亦不能行官民皆病然視漢時猶霄壤矣豈漢之金銀充溢如泥沙耶觀史漢所言黃金動輒數十斤後世抑豈能有此

左都御史于公振甲

成龍

說瀛臺蠶房有綠蠶視常蠶

差小作繭碧綠色遼東種也

偶約座客賦琴魚詩姜宸英西溟吳麐仁趾魏坤禹

平作皆佳姜詩云枯藤雙倚退食餘折柬相召一事
無坐中惟有城西朱竹且喜南榮日曝書軟語移時

動深酌仰看參橫挂屋角閑徵瑣細到蟲魚釘盤遙

數江南樂不見涪翁句春網薦琴高千里誰封裏致

此溪中毛神仙風味遺爾雅自得新詩更蕭灑中丞先有長句

儂家本住扶桑東扶寸的礫連叔筒海艷之味將無

同海艷南東產酷肖此魚勿訝鄉物輕比擬為公多致為佳耳他日

徵公海艷詩但言此心已馳彼吳云憑誰封寄到京

華下筴猶憐道路賒怪底人誇風味美年年春漲食

桃花魏驀山溪詞云桃花潭近千尺揉藍早一曲是

琴溪過清明腥風吹到仙人去後水族也畱名鱗影

細浪痕圓翠網都收了騎鯨無分客裏銜杯好玉

椀忽擎來最堪憐小於白小脆能下酒不用鱠銀絲

除非並箭頭魚風味輸多少按賔退錄云涇縣東北

二十里有琴溪溪側有石高一丈曰琴高臺有廟存

焉溪中別有一種小魚相傳琴高投藥汁所化號琴

高魚歲三月數十萬一日來集舊以入貢乾道中始

罷前輩多形之賦詠梅聖俞歐陽文忠公王禹玉皆

有和梅公儀琴高魚詩梅詩云大魚人騎天上去畱

得小鱗來按觴吾物吾鄉不須念大官常膳有肥羊

歐云琴高一去不復見神仙雖有亦何爲溪鱗佳味
自可愛何必虛名務好奇公儀元倡未見禹玉人不
足道詩句亦平平歐梅大手二絕句乃僞父面目以
今視昔孰謂古今人不相及耶錄又記汪彥章此字
韻古詩頗勝諸作

十月安慶巡撫江有良咨工部言懷寧縣民楊子育
漁于陶鷺夾湖獲巨蚌剖之得大珠一顆如龍眼核
重六錢四分非民間所宜畱咨送代進

于總憲振甲傳三祕方云皆有奇驗治咽食倒食症
一方用真柿霜拌稻米蒸飯食之八日不飲滴水效

又一方用虎肚燒末存性好酒調服效治傷寒症用
糯米粽無棗者和滑石末碾成錠曝乾燒炭浸酒去
炭熱飲之不論七日內外皆效七日內者卽汗七日
外者次日汗

侯鯖錄載紹聖中貶東坡毀上清宮碑令蔡京別撰
有人過臨江驛題二詩不書姓名或云江鄰幾或云
張文潛作也其二云晉公功業冠吾唐吏部文章日
月光千載斷碑人膾炙不知世有毀文昌此詩因坡
公而發特以退之淮西事爲譬非元和間人作也其
言吾唐者是時黨禁方嚴故託之前代云爾以爲直

言淮西事者誤婁堅以爲東坡詩尤誤矣

豫章集詩命輕人鮓齋頭船日瘦鬼門關外天北人
墮淚南人笑青壁無梯聞杜鵑或云李白歌羅驛詩
夢中爲魯直誦之蓋寓言也侯鯖錄以爲少游南遷
度鬼門關作首句作身在鬼門關外天墮淚作慟哭
末句作日落荒村聞杜鵑趙德麟及與黃秦游不應
有誤然山谷書歌羅驛尚有二篇而此詩絕類山谷
與少游不類且少游謫滕州人鮓鬼門亦非所經之
路也錄所載改數字不及黃本遠甚

坡公吳興飛英寺詩起句云微雨止還作小牕幽更

妍盆山不見日草木自蒼然古今妙絕語然不若截
取四句作絕句尤雋永如柳子厚漁翁夜傍西巖宿
只以欸乃一聲山水綠作結當爲絕唱添二句反蛇
足而聾者顧深贊之可一笑也予嘗定故友程職方
周量詩愛其一首云朝行青山頭暮歇青山曲青山
不見人猿聲相斷續云刪作絕句其妙什倍此可爲
知者道耳

東坡云歲行盡矣風雪凄然紙牕竹屋燈火青熒時
於此中得少佳趣予平生嘗于歲寒風雪時領略此
一段風味自謂雖三公不易然沉酣富貴人或難語

此

十月二十八日子蒙恩遷兵部右侍郎專理督捕

事務往晤趙少宰玉峰麟趙前以江寧巡撫內遷督

捕侍郎有美名故往請益趙曰比年條例已極寬大

吾輩更當推廣朝廷德意行之某在督捕三年只

以功過格計之日行幾善事則夜臥始安否則寢亦

不寧也久之反以得行善事爲樂而忘其官之久也

仁人之言哉趙雲南澂江人甲辰進士子宸黼庚午

新榜舉人

吾鄉刑部侍郎念東高公珩下筆妙天下而留意二

氏之學生平撰著不減萬篇常廣東坡勸爾一杯聊
復醉人間貧富海茫茫之意作小詞八首雖出遊戲
亦絕調也偶記一二于此云亭長歸來屯萬乘大風
雲北飛揚數行泣下美人裳楚歌爲若舞何似在烏
江銅雀雙鸞春苑轉挂釵便到分香西陵歌吹爲誰
長一杯聊復醉啼笑海茫茫送客白衣看短劍羽聲
擊筑相將雪園寒月倦遊梁夷門虛左地春暮綠蕪
長香水吳宮多少恨魚腸酒後如霜姑蘇麋鹿亦荒
涼一杯聊復醉恩怨海茫茫楊柳春風何婀娜幽蘭
瑟瑟秋霜江潭憔悴子蘭狂世情雙燕子隨處得雕

梁驚道碧紗新姓字大槐爭鑄金章木綿菴近半閑
堂一杯聊復醉榮悴海茫茫野外秋蓬風外絮一生
萍海中央青衫紅淚弔潯陽江雲天漠漠楓樹夢蒼
蒼漢月秦關秋雁斷短歌對酒河梁西風班馬玉鞭
長一杯聊復醉離合海茫茫不盡江潮鐵綽板商歌
玉樹秋江莓苔因雨上宮墻金仙畱剩淚百度續沾
裳汾水年年秋雁去雷塘楊柳含霜漁歌樵唱下斜
陽一杯聊復醉興廢海茫茫又三首不及錄使明皇
聞之必歎爲真才子也

元仇遠字仁近興觀詩集有牟巖方鳳二序俞希魯

蘇霖王洪胡儼瞿佑諸人跋尾此集仁近手錄以贈
盛元仁者僅律詩三十八首又書贈士瞻上人律詩
十首皆釋子題跋道衍其一也別有三十首亦皆近
體仇號山村南宋遺老有詩名格調靡靡遠在趙子
昂之下閔妃園池春日田園雜興此詩見月泉吟社石屋洞數
首差可觀仁近有句云咸平處士真堪羨死守梅花
住裏湖有味乎其言之也

己巳正月

南巡視河士禎以少詹事兼翰林侍

講學士家居迎

駕于德州四奉

溫諭蒙

上尊天廚之賜已述紀恩錄一卷備載其事矣

十一月初七日會議端門李少司馬厚菴語予云是日蒙 上賜謝 恩散歸後 上諭侍衛云王某如尚在外可召令入見侍衛傳 旨則士禎已入城矣復命 上云旣回不必往召 上之恩遇至此此前錄所未及謹識于右以示子孫世世勿忘

以太常寺卿胡昇猷爲都察院左副都御史前刑部尚書也僉都御史周之麟爲太常寺卿左通政陳肇昌爲僉都御史

以宗人府府丞年遐齡爲內閣學士兼禮部侍郎以太僕寺卿魏雙鳳爲宗人府府丞左通政李元振爲太僕寺卿李甲辰及第第二人前繼予爲國子祭酒禮部尚書張英罷仍以禮部侍郎掌翰林院詹事府事以熊賜履爲禮部尚書前武英殿大學士

居易錄卷九終

居易錄卷十

濟南 王士禛 著

國子監博士孔尚任字東塘曲阜聖裔博雅好古丙

寅丁卯間從故工部侍郎孫祀瞻在治下河在江都

得漢銅尺一上有文字曰慮虎銅尺建初六年八月

十五日造後又得一尺定爲司馬文正公布帛尺也

孔自作漢銅尺記周尺考周尺辨三篇極精核今備

載于左方漢銅尺記云江都閔義行博雅好古所藏

銅尺一朱碧繡錯爲賞鑒家所玩余旣得之乃不敢

以玩物蓄焉古者黃鐘律曆疆晦冕服圭璧尊彝之

屬皆取裁于尺而周尺爲准自王制不講鄉遂都鄙之間各從其俗于是布帛營造等尺代異區分遺法蕩然況禮樂之大者乎此尺有文曰慮虓音虓銅尺建初六年八月十五日造慮虓乃太原邑建初則東漢章帝年號也考章帝時冷道舜祠下得玉律以爲尺與周尺同因鑄爲銅尺頒郡國謂之漢官尺此或其遺與漢代去周末遠且禮經皆出漢儒漢尺之存卽周尺之存也聞之先王制法近取諸身遠取諸物然後尺寸之度起何休曰側手爲膚按指知寸布手知尺此則尺之取諸身者也律曆志謂一黍之廣爲分

十分爲寸十寸爲尺此則尺之取諸物者也指有長短黍有巨細每不相符漢儒因有指黍二尺之辨此尺取指取黍固不能定今以中指中節量之適當一寸無毫髮差及纍黍試之正足一百何指與黍之偶符若此耶廣一寸厚五分重抵廣法十八兩歸之闕里凡造禮樂器皆准之准周尺也周尺考云虞書同律度量衡三代共之至秦不師古而後紛綸莫定迨六朝割裂之餘乃有大升大兩長尺不等當時調鐘律測晷景及冠冕禮制用小者餘公私俱用大者宋人考定制度集古尺法爲十五種曰周尺曰晉田父

玉尺曰梁表尺曰漢官尺曰魏尺曰晉後尺曰後魏
前尺曰中尺曰後尺曰東魏後尺曰蔡邕銅籥尺曰
宋氏尺曰隋水尺曰雜尺曰梁俗間尺而必以周尺
爲之本蓋非周尺無以定諸尺之失蔡邕獨斷曰夏
十寸爲尺殷九寸爲尺周八寸爲尺何以知其八寸
爲尺也王制曰周尺八尺爲步司馬法曰一舉足曰
跬跬三尺兩舉足曰步步六尺儀禮注武跡也中人
之跡尺二寸五武爲步步六尺故禮書以周六尺四
寸爲步又說文曰伸臂一尋八尺徐鍇曰六尺曰尋
小爾雅曰四尺爲仞倍曰尋包咸鄭康成皆以仞爲

七尺應邵以爲五尺六寸顏籀曰八尺爲仞取人臂
一尋語爲山九仞釋文曰仞七尺孟子掘井九仞註
仞八尺然皆不越乎八與六之間故禮書以周六尺
四寸爲尋六尺四寸者十寸之尺也十寸之尺六尺
四寸乃八寸之尺八尺也兩足步之如是兩手尋之
亦如是按禮記周尺鄭註周猶以十寸爲尺六國變
法度或言周尺八寸然亦非也所云周尺八寸者蓋
以當時所用尺較周尺之長短止當八寸故云周尺
八寸而非但用八寸也考工記于案言十有二寸于
鎮圭言尺有二寸則是周之長尺有十寸周之短尺

亦有十寸文公家禮言古尺五寸五分周尺七寸五分則又以宋時布帛尺較之矣郎瑛曰周八寸為尺秦比周七寸四分前漢官尺比周一尺三分七毫劉歆銅斛尺後漢建武銅尺與周同建初間得周玉律以為尺謂之後漢官尺疑非建武三國蜀吳同周魏比周一尺四分七毫後魏前尺比周一尺二寸七釐中尺比周一尺二寸一分一釐後尺比周一尺二寸八分一釐晉田父玉尺世說田父于野中得周時玉尺與梁法尺比周一尺七釐後晉比周一尺六分二釐宋齊尺比周一尺六分四釐梁表尺比周一尺二分陳尺同後晉東魏比周一尺五寸八釐市尺與後魏後

尺同隋開皇官尺同上

市尺官尺皆鐵尺

萬寶常所造木尺比周

一尺一寸八分六釐

以前多銅為之至此用木

唐尺與古玉尺同

貞觀中武延秀

為太常得玉尺以為奇玩獻而失之其迹猶存所定得六之五

開元尺度以十寸為尺尺二寸

為大尺五代世短多相應襲志無考也惟周王樸所定尺比周一尺二分有奇及宋二景表尺比周一尺六分有奇胡瑗樂書黍尺比周一尺七分司馬光布帛尺比周一尺三寸四分元尺傳聞至長志無考明部定官尺皆依家禮布帛尺凡田畝布帛營造所用悉同雖南北稍有參差然必以部定官尺為準五尺為尋十尺為丈一百八十尺為一里五尺為步十尺

爲弓二百四十步爲一畝茲建初銅尺當明所用官尺七寸五分明所用官尺卽宋布帛尺也布帛尺比周一尺三寸四分固知銅尺與周尺無二周尺八尺爲步八尺爲尋今以銅尺較止足六尺六寸五分或者今人身短小故步尋較古減一尺若用明官尺六尺爲步六尺爲尋而銅尺乃足八尺之數若再分銅尺爲八寸更益二寸則是古十寸尺當得六尺四寸之數我朝丈田稍增尺數每尺加一寸以明官尺五尺五寸爲一步尋而銅尺又當用七尺四寸矣去古日遠遺法莫考幸得漢銅尺與周尺相准歷代制

度了然無疑因詳書之以俟後賢參考焉周尺辨云世儒考制度皆本周尺蓋三代損益惟周爲詳本之是已然亦何所得周尺而本之哉或者皆臆說耳宋潘時舉註家禮曰程先生本主之制取象甚精可以爲萬世法然用其制者多失其真往往不考周尺之長短故也蓋周尺當今省尺七寸五分弱而陳氏文集與溫公書儀多誤註爲五寸五分弱而所謂省尺者亦莫知其爲何尺時舉舊常質之晦翁先生答云省尺乃是京尺溫公有圖所謂三司布帛尺者是也繼從會稽司馬侍郎家求得此圖其間有古尺數等

周尺居其右三司布帛尺居其左以周尺較之布帛尺正是七寸五分弱因圖二尺長短而著伊川之說于其旁庶幾用其制者可以曉然無惑余觀家禮三尺圖各分十寸爲冊幅所限僅圖尺形而非尺准也其古尺圖註云當今省尺五寸五分弱周尺圖註云當三司布帛尺七寸五分弱當浙尺八寸四分三司布帛尺圖註云卽是省尺又名京尺比上周尺更加三寸四分當周尺一尺三寸四分當浙尺一尺一寸二分蓋司馬公家有石刻本故其說可據今刻本已不可見而世但以家禮所圖爲尺式豈知乃尺形非

尺准也如爲尺准何以短二寸五分之周尺與長三寸五分之布帛尺式相等耶世儒紛紜傳會止據家禮之尺形余故知其皆臆說也今旣得建初銅尺與周尺同周尺旣定何尺不定因定曰建初銅尺與周尺同當古尺一尺三寸六分當漢末尺八寸與唐開元尺同當宋省尺七寸五分當宋浙尺八寸四分當明部定官尺七寸五分弱當今工匠尺七寸四分當今裁尺六寸七分當今量地官尺六寸六分當今河北大布尺四寸七分余之能定者以有建初銅尺在也設無之此說亦臆矣

予鄉文獻舊家以臨朐馮氏爲首初閭山公裕居遼東從賀醫閭學中正德進士官止副使歸居青州有四子惟健舉人惟重進士官行人惟敏舉人官通判惟訥進士官光祿寺卿惟訥字汝言最有文名著古詩紀風雅廣逸諸書惟健字汝強以詩名惟敏字汝行詞曲爲明第一手惟重字汝威名稍遜伯叔季而其子子咸以進士官給事中夢天帝以韓魏公爲其子遂生文敏公琦官至禮部尚書號文章經濟大儒光祿曾孫易齋公溥本朝官少傅文華殿大學士兼刑部尚書數代皆有集傳于世

院寺舊無員外主事之名後翰林院起居注添設主事四員太僕寺員外郎八員皆以滿洲人爲之

同年僉都御史陳省齋肇昌黃岡人有六子次子大章康熙戊辰進士翰林庶吉士第四子大羣五子大華庚午同捷楚榜大華又解元也是科長子大年亦中順天副榜第一省齋卽于是冬擢僉憲父子兄弟極一時之盛朝士榮之後幼子大輦又中壬午鄉試陳司空說巖招同朱竹垞姜西溟飲觀東坡穎沙彌書迹帖凡數百字甚奇又觀劉松年宮蠶圖門人蒲城趙舉人善昌貽曹全碑碑在漢隸中最爲

完好書法圓美此碑萬曆時出于邵陽歲月未久故
鮮刊缺趙岫石墨鐫華于奕正金石志始載之都元
敬著金薤琳琅未及見也碑尾署中平二年十月丙
辰造

郭祥正功父青山集閩謝氏寫本六卷古詩二卷近
體詩四卷七言歌行僅二篇或有闕文也祥正多與
王安石倡和之作李之儀晚居姑孰與祥正有隙至
爲詩排詆最力蓋各有所主也方安石當國祥正上
言請以天下大計專聽相公區畫罷一切異議者其
人可知已詩格亦不高偶喜其三絕句云原武城西

看杏花紛紛紅雪委泥沙何如姑孰溪頭見照水蒙
煙小謝家又渡江乘興泊江干草襯殘花色未乾慣
在釣魚船上住一簑一笠伴春寒又籃輿投曉出重
城桃李無言似有情淡白輕紅能幾日可憐吹洗過
清明又稻秧才一寸蠶子始三眠

句

張光啓字元明章丘人世居白雲湖上少爲諸生有
名爲梅長公朱未孩二公所知崇禎庚辰年四十遂
棄諸生闢一圃曰省園以種樹藝花自樂亂後足不
履城市年八十餘卒有張仲集詩若干篇予刪存百
餘首往往可傳嘗有句云盡日閑看高士傳一生怕

讀早朝詩卽其志可知也

宋時士大夫多重充墨余已記之前卷讀范宣公集有充墨詩云誰熟長松製作勤輕煤勺膩雜蘭薰中疑立石無纖翳外似靈犀有密紋溪石乍研浮紫翠蜀牋試寫落煙雲會將點畫傳青簡千古忠邪爲爾分忠宣公不以詩名五言如溪風消酒力煙樹入春愁最工

李戶部說蜀有墨猿通體黝黑可愛常于樹上騰跳足不履地獵者不能獲又有謳猿其聲如謳

四川道監察御史陸龍其疏言孝道爲萬事之本奪

情非治世所宜仰祈 聖斷以維綱常事臣辦事署中聞九卿科道會議湖南巡撫于養志在任守制一事臣以資淺不在會議之列不知所議云何及詢與議諸臣謂會議之時昌言其不可者固有其人而依違不斷者比比而是臣竊怪之此明白顯易之事有何可疑而依違若是夫治天下之不可不以孝易明也在任守制之非所以教孝易明也天下正當承平之時湖南又非用兵之地無藉于在任守制易明也

皇上以孝治天下在廷諸臣沐浴于 皇上孝治之中久矣何難一言直斷其不可耶且臣不知

議者以于養志為何如人如其非賢者耶則固不當使之在任守制矣如其誠賢者耶則必不肯安心于在任守制矣在督臣代為題請或從愛惜人才起見然臣以為使之解任全孝正所以深愛惜之況

皇上一日所行天下萬世奉為法程者也若使一撫臣因督臣之題請而留將來督撫之丁憂者皆將援此以為例其不思僥倖奪情者鮮矣名教自此而弛綱常自此而壞此端一開關係天下實非淺鮮至于湖南一省之人是則是做不復知有父母又無足論矣云龍其字稼書平湖人庚戌進士初官嘉定知縣

有廉名巡撫慕天顏惡之疏劾降級故尚書魏敏果象樞力言于朝得還職補靈壽知縣今年夏五月

詔九卿舉廉吏龍其與三河知縣彭鵬清苑知縣邵嗣堯麻城知縣趙蒼璧四人奉 特旨行取彭

給事中邵陸趙三人俱御史

梅文鼎字定九宣城諸生也著中西算學通若干卷中者中國之法西者泰西之法也其書有九一曰籌算

目有七曰乘除平方立方帶縱平方帶縱立方開方捷法開方分秒二曰筆算目六曰加減乘除異乘同除開方其別有二曰西域法回回法

三曰度算目十曰平分線分面線分體線更面線更體線分圓線正弦線割線切線五金線其別為矩算四曰比例

算目三曰比例四線比例四線新比例五曰幾何摘要目三曰線面體六曰三角法目二曰平三角

弧三

角 七日方程論

目六曰正名極數致用刊誤測量雜法

八曰勾股測量

目二曰測高測深測遠

其別有六曰矩度矩尺象限儀鏡測笠測扇測

九曰九數存古

目九曰方田粟布差分少廣均輸商功盈不足方程勾股

精于曆學嘗合七十餘家著曆學通考亦今之異人也

予家世業毛詩幼時即疑晦菴臆改小序之非宋元明已來駁之者甚眾非予創論也嘗欲輯歐蘇呂嚴諸家之說作為一書嘗著其說于木瓜詩辨猶恨藏書少耳頃得崑山新刻經解又數種如逸齋補傳成伯璵指說李樗黃樵集解朱倬疑問朱善解頤詳略雖不同要皆可互相發明獨王柏詩疑輔廣童子問

朱鑑遺說朱升劾注傳會固陋無足采錄

武昌舉人葉道復以其父工部主事井叔

封

遺詩來

井叔本嘉興人寓黃州順治己亥進士篤實君子也

由登封令入為兵馬司指揮其族弟文敏公方藹介

于予以詩來質予盡刪其舊作獨取其嵩山詩五六

十篇為嵩遊集序而刻之又選其己未庚申詩刻之

列其詩于十子中于是井叔之名益噪康熙己未以

博學宏詞徵罷歸及吏部銓授虞衡司主事而井叔

已前卒年六十餘矣井叔精爾雅說文學有根柢所

輯嵩山志嵩山石刻集記皆可傳

井叔未第時酷貧嗜讀書家樊口湖中王宗伯吳廬
澤弘常扁舟過之值湖漲不辨涯涘日已暮聞有書聲
出蘆荻中先悲哀而後愉樂曰此必井叔也迹之果
然

文則詩則各三卷周居岐撰居岐字伯康號與泉濟
南歷城人嘉靖間官當塗知縣周吾里前輩無詩文
名然其自序二篇甚有理致

潁川劉氏閨閣皆知書同年公戩吏部往爲予述其
女姪名第五幼工詩兼能古文從姪楷妻李氏亦工
詩予壬子使蜀時楷令洪洞李以詩卷來相質今皆

歿矣第五之女姪名令佑姪爲公戩甥寧擢益賢子
婦今年才二十詩詞書迹以至金石篆刻皆臻妙何
巾幗之多才也嘗爲予刻一小印款云潁川女士
康熙三十年辛未元旦 上御太和門受朝賀午

賜宴召滿漢內閣大學士學士六部尚書侍郎
都察院都御史副都御史上殿 賜酒是日風日
暄霽仰瞻 天顏悅豫羣臣皆喜

以太僕寺卿李元振爲都察院左副都御史

胡副憲昇
猷以疾卒

位于

命禮部尚書熊賜履兵部督捕侍郎王士禎俱以原

銜充 經筵講官先是大學士徐公元文以兼領翰林院掌院事不解講官去年某月罷禮部尚書張公玉書爲文華殿大學士例解講官翰林院以部院由翰林出身諸臣名上畱中數月至是以仲春 經筵屆期特有是 命士禎以菲才與焉旣感 聖恩高厚益自愧報稱之難也

二月初二日同兵書李公天馥刑書杜公臻工書陳公廷敬吏侍李公振裕赴 起居注館會看 經筵講章先是翰林院進擬題目 欽點孟子后稷教民稼穡一段尚書六卿分職一段講章則張公英及陳

公撰也

以大理寺少卿唐朝彝爲太僕寺卿山東布政使衛旣齊爲順天府府尹

初六日晨內閣九卿啓 奏乾清門辰刻奉 旨

以戶部尚書文華殿大學士張玉書 經筵講官工部尚書陳廷敬兵部右侍郎李光地 經筵講官兵部督捕右侍郎王士禎爲會試主考官禮部左侍郎王颺昌爲知貢舉官同考十八人翰林院編修許承家等七人兵科掌印給事中卞三畏等四人吏部郎中鍾儀傑等七人宴于禮部 賜金花絲緞表裏各

有差宴畢入鎖院

二十七日恭呈十卷進

御覽次日奉

旨着

考試官自定次第先是二十四年乙丑科會試主考

官刑部尚書張公士甄

今吏部尚書

等始進擬十卷恭請

上裁 欽定名次以陸肯堂爲第一戊辰已來遵

爲定例然戊辰亦未 欽定云

三月初一日放榜中式舉人百五十六人會元張瑗

江南祁門人滿洲巴海等四人烏金超哈胡麟徵等

二人

以試監察御史邵嗣堯爲直隸守道叅議舊例科道

官非外轉無出爲監司者至是守道缺奉

特旨

直隸守道員缺緊要着以邵嗣堯轉補重其選也

掌河南道監察御史王承祐疏請以安慶廬州鳳陽

三府滁和徐三州仍歸南卷舊例會試以廣西四川

雲南貴州四省及江北三府三州爲中卷自丙辰科

以滇黔亂去中卷之名以三府三州歸南卷雲南平

復舊是科榜發廣西雲貴三省遂無一人入彀者故

言官有是請部議允行

徐編修元正子貞貽石門呂氏新刊司馬文正公稽

古錄二十卷首有文正公進表一首朱文公與鄭知

院書以爲此書當與六經同進講筵云

貴州巡撫田中丞予綸雲寄所著黔書乞序中述名

宦頗及先太僕太師二公太僕嘉靖中官貴州監司
歿于黔今永寧衛有專祠太師則萬曆中以兵侍總
督川湖貴州軍務云

盤山拙菴智朴禪師以所創山誌若干卷屬叅訂頗
有體裁所錄碑刻詩文等亦不汎濫所述山中物產
一卷尤雅

田子綸中丞作黔書凡七十六篇篇不一格其記苗
蠻種類記水西烏蒙馬記革器記朱砂水銀雄黃凱

里鉛蒟醬邛竹諸篇有似爾雅者似考工記者似公
穀檀弓者似越絕書者讀之如觀化人之戲故相國
孫文定公泚亭作顏山雜記記山蠶琉璃窑器煤井
鐵冶等文筆奇峭亦如此

戊辰春予來京師朱太史竹垞招飲古藤書屋食半
翅甚美不知是何鳥閱盤山新誌云爾雅鷓鴣冠雉
郭璞注鷓大如鴿似雉鼠脚無後指岐尾爲鳥愍急
羣飛出北方沙漠盤山多有之士人呼爲半翅卽沙
雞也一名鐵脚

拙菴山居詩有極似寒山子者其佳句如雪衲經時

補春薪帶雨燒青溝一派水紫蓋萬重山閑心將白日隨意斬青茅木蛇鱗甲異俊鷁羽毛青蒲團安養地秋色淨居天鬢從新處白天自舊來青竹牕來夜月茆屋隱春雲皆可誦

庚午于慈仁寺市得如臯孫應鰲淮海易談四卷每舉以語揚之士大夫訪其他所著書輒無知者讀黔書乃知公字山甫本如臯人籍清平衛嘉靖己酉舉貴州鄉試第一癸丑進士改庶吉士歷僉都御史撫治鄖陽入爲大理卿以禮侍掌國子監祭酒事終南京工部尚書萬曆庚子黔撫郭子章爲請諡諡曰文

恭始青螺入黔鄒南臯謂之曰黔孫淮海李同野馬心菴皆致力道學君此行惜不及見三君耳又胡正甫語青螺宇內講明正學楚有黃安耿公蜀有內江趙公黔有清平孫公豫章有南城羅公孫公著述有學孔精舍類稿教秦語錄春秋節要律呂分解等書易談其一耳

史多曲筆所謂盡信書不如無書也漢昌邑王之事吾嘗疑之及讀東坡所論始暢然坡云觀昌邑王與張敞語真清狂不慧者烏能爲惡旣廢則已矣何至誅其從官二百餘人以吾觀之從官中必有謀光者

光知之故廢賀非專以淫亂故也二百人者方誅號呼于市曰當斷不斷反受其亂此其有謀明矣特其事秘史無緣得之著此者亦欲後人微見其意也武王數紂之罪孔子猶且疑之光等數賀之惡可盡信耶論世者須具如此識力乃不墮古人雲霧中

十八日

萬壽節

上不受朝賀免廷臣進表

惟在外督撫進表如故

二十三日

御太和門傳臚

賜中式舉人戴有

祺及第第一初讀卷官內閣九卿擬吳昺第十有祺

第二楊中訥第三旣進

御覽故有祺第一昺第

二黃叔琳第三中訥居二甲之首昺全椒人故禮科給事中國龍子對策倣陸宣公奏議 上以書法拔有祺狀元而昺次之又以鼎甲久無北人拔叔琳次昺叔琳大興人中訥海寧人同年兵部左侍郎雍正子遇合之有定數如此

有祺戊辰進士休寧人籍華亭

本朝狀元非本科

中式者壬辰之鄒修撰忠倚己丑中式甲辰之嚴侍郎我斯榜眼李都御史元振皆辛丑中式及此而三添設盛京兵部調兵部左侍郎舜拜爲盛京兵部侍郎盛京舊止設戶禮刑工四部侍郎及郎中等官至

是奉 旨添設戶科給事中王原祁因疏請倣明
南京例并添設漢侍郎以下下九卿詹事科道會議
不行

昺試卷在會闈予所特拔及拆號王少宗伯吳廬亟
稱之明旦榜發入 朝遇李少宰醒齋振裕王閣學鶴

汀尹方皆爲主司賀得人李前督江南學政王卽庚午

江南鄉闈主司也昺父伯叔兄弟五人進士第者凡
四其世父國對順治戊戌一甲第三人也兄晟丙辰
進士從兄昇戊午舉人蓋家學云後其弟早又中壬
午順天鄉試

人家科第在積學種德堪輿之說非所論也然亦有
灼然可信者門人全椒吳昺述其曾祖體泉翁爲父
卜吉壤致聞人簡堯坡者于家廩餼甚厚簡日爲擇
兆域三年不可得辭歸翁固畱之一日同往梅花山
中遇大雪同飲陳家市酒樓簡倚檻遠眺久之罷酒
起曰異哉吾遠近求之三年不得乃在此乎遂同往
三里許審視良久曰是矣雪晴更往觀之喜曰天賜
也得此地足報君矣然葬後君子未卽發至孫乃大
發發必兄弟同之對面文峯秀絕發必鼎甲然稍偏
未必鼎元或第二第三人亦不僅一世而止翁如言

卜葬其後孫國鼎字玉鉉中崇禎癸未進士國縉字
玉林順治己丑進士國對玉隨國龍玉駟學生玉隨
順治戊戌進士及第一甲第三人官翰林侍讀玉駟
亦癸未進士官禮科都給事中至昂兄弟又前後舉
科第而昂今辛未科及第一甲第二人簡之術亦神
矣

兵部職方司督捕主事齊祖望雞澤人予令訪其縣
人殷岳伯巖遺集得畱耕草堂詩一卷僅讀史三十
首登嵩登岱詩各六首餘十八首共五十餘篇皆五
言古體也殷平生不爲律詩永年申涵光和孟序之

云宗山不多作詩復不耐聲偶爲古詩淳龐淵穆莽
莽可敵萬夫乙未正旦祀先畢卽阜帽跨驢攜一童
子遊嵩少婆娑緱嶺有遺世之思已乃入大鵬大鵬
人好之畱數月予與傅掌雷太史將登岱宗山衣塵
未拂欣然同往時方病腰脊比歷天門松聲謾謾萬
山在下大叫奇絕棄肩輿步登不知沉疴之去體也
夜宿岳頂予二人憊而偃卧宗山夜數起謂羽人日
出時喚我已而雨聲浙瀝少止卽躍起視戶外以星
辰隱見爲憂喜竟夕不寐其嗜奇癖山水如此宗山
亦殷字也予往見其詠史詩于國門集古鬱涼壯有

橫梁之風河朔一奇士也和孟節愍公子有高義與
予兄弟相友善同時有張蓋字覆輿狂士詩亦奇皆
廣平人又趙湛秋水劉逢源津逮亦廣平人能詩皆
與予善

錢牧翁撰列朝詩大旨在尊李西涯貶李空同李滄
溟又因空同而及大復因滄溟而及弇州索垢指瘢
不遺餘力夫其駁滄溟擬古樂府擬古詩是也并空
同東山草堂歌而亦疵之則妄矣所錄空同集詩亦
多泯其傑作黃省曾吳人以其北學于空同則擯之
于朱凌谿應登顧東橋麟輩亦然予竊非之偶著其

略于此牧翁于予有知己之感順治辛丑序予漁洋
詩集有代興之語寄予五言古詩云勿以獨角麟儷
彼萬牛毛今三十餘年先生墓木拱矣予所以不敢
傳會先生以誣前輩者亦欲爲先生之諍臣云爾
西涯相業大有可議卽劉謝去國一語李百喙何以
自解牧翁乃強以擬東坡不知其人品相萬也又欲
以顧文僖魯文恪輩追配黃秦晁張以予論之未見
其可

襄城李來章本名灼然以字行改字禮山常執經于
予工爲古文戊辰下第與中牟冉覲祖永光同居嵩

下從宮詹逸菴耿先生講學各有詩一卷庚午冬公車見之予曰詩三百主言情與易太極說理判然各別若說理何不竟作語錄而必強之爲五言七言且牽綴之以聲韻非蛇足乎荆川之徒撰白沙定山及荆川詩爲二妙集繼擊壤集後以爲詩家正脉菟林傳爲笑柄詎可踵其陋哉

牧齋訾訾李何則并李何之友如玉襄敏孟大理輩而俱貶之推戴李賓之則并賓之門生如顧文僖輩而俱褒之他姑勿論東江集予所熟觀詩不過景泰成化間沓拖冗長之習由來談菟家何嘗推引而遠

欲揚之王子衡孟望之之上豈以天下後世人盡聾瞽哉

門人盛御史珍示

符升

自吳中寄古文正集十卷續集

二十二卷崑山葛鼎字端調刊本也正集自左國迄唐宋六家之文而李習之與焉續集自唐魯公敬輿文饒牧之逮宋韓范司馬以下以及南宋朱晦菴陳同父真西山諸公元則劉靜修虞道園二家予家舊有正集續則訪之十餘年而不得者唐文如獨孤常州元道州呂衡州權載之李觀沈亞之司空表聖孫樵劉蛻陸龜蒙皮日休羅隱輩宋文如石守道柳仲

塗尹師魯穆伯長秦少游陳履常晁以道无咎羅端
良陸務觀葉水心輩予家皆有其集雖利鈍互見要
之有可觀者暇當掇拾編綴更爲一集以廣此書之
所未及

錢牧翁云王侍郎損仲

惟

留心宋後三史苦宋史煩

蕪刪定成書吳興潘昭度鈔得副本損仲家圖籍沈
于汴京之水未知吳興鈔本云何庚午歲石門呂葆
中無黨遊太學至京師予見其行笈有此書蓋評潘
本塗乙宛然凡二百五十卷首紀次表次傳次志紀
十五表五列傳二百志三十通爲宋史記其義例大

略本紀則更瀛國公爲帝熹增端宗帝昺二紀年表
于宰輔外增南唐諸國及遼金二表而附以夏國宗
室傳于英宗皇考濮王孝宗皇考秀王之後增理宗
考榮王希瓚改南唐北漢世家依漢書項羽例總名
列傳宰執中如王安石之亂法耿南仲之悞國皆特
書以示戒若庸臣如李昌齡姜遵輩倣漢書陶青劉
舍之例止于他傳末附見姓名年表具爵位而已史
彌遠嵩之一代窮奇李知孝梁成大相門鷹犬舊史
于二史虛事褒揚梁李徒有官簿并從刊正諸史止
有儒林宋史始列道學道學之目乃賈同胡紘諸奸

勅之以攻朱熹者今刪去道學通曰儒林舊史奸臣
傳倣新唐書例然既列惇布諸人而史彌遠之易皇
嗣史嵩之之醜直臣罪豈可貫史家據事直書忠邪
自見不必復別之爲奸始足懲戒也若薛昂羅汝楫
陳自強王次翁之流皆附諸奸本傳之下志則曆法
刪天文五行二志郡邑禮儀衛輿服二志併入樂食貨河渠兵刑百官選舉
凡十篇卷帙繁重未及繕寫聊述其大凡于此吉水
劉晉卿同升狀元亦曾刪定宋史江右洵經兵燹不知
其書猶有存否朱竹垞云此書改定目錄是湯養仍
親筆詳錢牧翁東都事略跋中

戶部郎中宗人培益仲示新著周禮左傳國語刊誤
益仲舊著二十一史通鑑綱目刊誤二卷亦讀書稽
古之士

居易錄卷十終

居易錄卷十一

濟南 王士禛 著

絳州趙師尹字子衡作石鼓文音注考異其自序曰
周宣中興續雅十見籀詩石鼓之文視車攻吉日不
知孰爲橐草唐貞觀中始出太史采詩之遺非孔子
所刪也後百六十餘年至韓氏愈尚毫髮無譌又三
百年宋蘇氏軾摹其文一鼓已泐間有訓注或未身
詣鼓旁或并罕見蘇本

惟潘迪陶滋親見石鼓陶與
楊慎趙宦光又皆得蘇本

競相揣

量汔無諦據元潘氏迪作音訓屢吞章止一鼓字字
存三百八十六今斲滅又四十六世無摹本元文寢

剝從誰究詰乎由唐距今幾經罅裂幾經塌損宋大
觀中金填其文又經匠斲未免以說文釋籀或采諸
注則又以隸釋籀矣說文所存籀書二百餘三爾其
在石鼓僅九字全文七百餘三而什一不見于說文
烏可以說文釋籀耶諸家詁訓言人人殊此是彼非
已難險度鼓孔子所不得見許慎所不得說而欲以
意求之其于籀果何如又烏可以隸釋籀耶天不欲
斯文盡喪幸存蘇本蘇在金填匠斲先七十載所見
必真趙氏宦光為章句為補亾恃有此爾陶氏楊氏同余原
本六書考據諸氏糾其失六十又三亦恃有此爾蘇

不摹籀則籀已亾繼蘇摹籀籀書不尚存天地乎茲
鼓在岐陽榛莽千四百餘年而石理未損唐至今僅
千餘年大半湮沒鑿曰也填金也沈諸水也如使石
能言必且曰吾出而覘于世吾厄也吾入廟而蒙以
金毋寧岐陽榛莽爾匪剝奚駁匪摹奚存摹而存非
吾儒之責誰責乎余絳諸生也摹注以傳僅此爾周
宣大閱又十見籀鼓所謂樂石者也貞諸樂石畱諸
太學亦曰此周詩爾孔子而在義合存周孔子之徒
應仕朝列代不乏人奏大君附小雅與車攻吉日並
垂千古是其在後君子所引據書凡五十二部博雅

士也朱竹垞翰林著日下舊聞亦作石鼓考三卷
朱翰林學士楊億大年武夷新集二十卷景德丁未
大年在翰林所自編定也詩五卷雜文十五卷閩謝
在杭寫本大年以西崑體擅名宋初其詩在同時錢
劉諸公之上攬其全集警策絕少文皆駢體大抵五
季已來風氣如此而石守道作怪說三篇刺之張皇
其詞亦過矣介最推柳仲塗至擬之周孔尤妄予嘗
于池北紀談辨之

古靈集二十卷宋樞密直學士陳襄述古著李忠定
公綱序從孫知贛州輝跋子擘撰年譜一卷附集後

詩六卷雜文十四卷

以書啓狀序記內制奏狀劄子詳定禮
文祭文議論策問易履講義誌銘爲次

亦謝

氏寫本述古熙寧中在講筵論薦司馬溫公已下三
十三人各有品隲皆定論也司馬公云忠亮正直以
道自任韓持國云器識方重學亦醇正呂正獻公云
道德醇明學有原本以進賢汲善爲已任蘇子容云
記問博洽長于史學國朝典故多所練達孫莘老云
素有鄉行明經術義理之學李公擇云性行醇正兼
治經術可比孫覺即莘老范忠宣公云忠義骨鯁其才足
以濟大事蘇文忠公云豪俊端方雖不長于經術然
子史百氏之書無所不覽居官敏恕尤通政事曾子

固云以文學名于時詞近典雅與軾之文各爲一體
孫巨源云博學能文所守亦端可充文翰史臣之選
劉莘老云性行端淳詞學淵邃置之文館必爲遠器
程明道云性行端醇明于義理可備風憲之任張橫
渠云學行修明養心事道不苟仕進西方學者如載
一人而已蘇穎濱云其學與文若不逮軾而靜厚過
之孔經父云性行淳粹如不能言發爲文章溫厚正
直王平甫云材器磊落文亦豪邁向居罪廢不忘進
學鄭介夫云小臣愚直敢言發于忠義非陛下矜憐
其志使得生還誰復爲俠言者讀述古薦章可想見

當時人才之盛而元祐更化首相溫公申公衆正盈
朝不外所薦諸君子使宰相爲國用人公忠如此古
云噐使何以加茲今集中以此列編首而冠以紹興
元年求賢手詔略云近得陳襄薦章起草司馬光而
下三十三人德行言語政事文學皆所具備審如所
薦斯爲極矣後世瞻之仰之以襄爲何如人耶
四月十二日 車駕出塞百官跪送于東華門以
喀爾喀七旗部落內附故也

宋謝邁幼槃竹友集十卷詩七卷雜文三卷謝方伯
在杭手鈔本邁臨川人逸之弟江西詩派二十五人

之一也在杭跋云幼槃詩文不傳于世此本從內府
借出時方涸寒京師傭書甚貴需銓京邸資用不贍
乃手自鈔寫每清霜呵凍十指如槌幾二十日始克
竣帙藏之于家亦足詫一段奇事也萬曆己酉十二
月二十四日辛酉前有苗昌言呂本中二跋幼槃詩
居仁稱其似宣城非也在江西派中亦清逸可喜然
涪翁沉雄豪健之氣則去之遠矣顏魯公祠堂十八
學士圖諸長歌頗佳格詩如尋山紅葉半旬雨過我
黃花三徑秋按莎蕉葉展新綠從東榴花開晚紅瘦
藤柱下萬峯頂野鶴來歸千歲巢皆佳句又靡靡江

籬只喚愁眼中何物可忘憂棟花淨盡綠陰滿纔見
一枝安石榴甚有風致非蘇黃門庭中人不能道也
無逸詩尤有名溪堂集視此未知何如耳

鄞人萬斯同字季野明都督表之後舉人泰之子黃
宗羲太冲之弟子也投予所著禘說八篇駁鄭康成
之非而据唐趙匡宋程子之說以爲證其言甚辯而
核又嘗補歷代史表五十四卷凡六十篇益以明史
表一十三篇曰東漢世表外戚侯表雲臺功臣侯表
宦官侯表將相大臣年表九卿年表曰三國漢季方
鎮年表魏諸王世表漢諸王世表吳諸王世表魏國

將相大臣年表魏將相大臣年表魏方鎮年表漢將
相大臣年表吳將相大臣年表曰晉諸王世表功臣
世表僭偽諸國世表將相大臣年表東晉將相大臣
年表方鎮年表東晉方鎮年表僭偽諸國年表偽漢
將相大臣年表偽趙將相大臣年表偽燕將相大臣
年表偽秦將相大臣年表偽燕慕容將相大臣年表南
燕將相大臣年表偽秦姚將相大臣年表偽成將相
大臣年表曰宋諸王世表將相大臣年表方鎮年表
曰齊諸王世表將相大臣年表方鎮年表曰梁諸王
世表將相大臣年表曰陳諸王世表將相大臣年表

曰魏諸王世表異姓諸王世表將相大臣年表西魏
將相大臣年表東魏將相大臣年表曰北齊諸王世
表將相大臣年表曰後周諸王世表公卿年表曰隋
諸王世表大臣年表曰五代諸王世表將相大臣年
表吳將相大臣年表南唐將相大臣年表前蜀將相
大臣年表後蜀將相大臣年表南漢將相大臣年表
北漢將相大臣年表十國興廢年表方鎮年表李鄴
嗣序又云三國則做大事記作三國大事年表隋唐
之際則做秦楚之際作月表觀其目錄可知其史學
之淹通也斯同兄斯大字充宗深于經學予及見所

著學禮質疑太冲序之其姪言字貞一予門人也能
古文有管村文集鄞又有陳赤衷者字葵獻亦邃于
經學在太學從予遊歿于京師嘗鈔袁桷清容集遺
予又董允瑫字在中舉人丙辰公車嘗以古文質予
皆太冲門人亦早歿黃之子百家今在京師

宋樓宣獻公鑰攻媿集八十五卷溫陵黃氏寫本詩
僅九卷雜文七十六卷諸體中題跋最勝宋集多叢
冗此集如表狀內外制書啓之類刪去半部亦可宣
獻與楊誠齋范石湖陸放翁同時詩亦石湖伯仲歌
行學蘇黃氣或不遒格詩苦鈍然不爲楊范佻巧取

媚七字如行盡杉松三十里看來樓閣幾由旬一百
五日麥秋冷二十四番花信風水真綠淨不可唾魚
若空行無所依雖宋調亦佳句也

樓攻媿集跋坡書三笑圖贊辨慧遠法師陶淵明陸
修靜始末甚詳錄之以備參考云坡書三笑圖贊不
言爲誰山谷實以陶陸遠公事陳舜俞廬山記亦云
舉世信之宗室彥通作廬山獨笑一編乃以謂遠公
不與修靜同時予因其言細考之十八高賢傳遠公
卒于晉義熙十二年丙辰年八十三而吳筠所撰簡
寂陸君碑修靜卒于宋明帝元徽五年丙辰去遠公

之亾正一甲子而修靜年七十有二推而上之生于
義熙之三年丁未遠公之亾修靜才十歲況修靜宋
元嘉末始來廬山遠之亾已三十餘年淵明之亾亦
二十餘年矣淵明生于晉興寧之乙丑少遠公三十
一歲卒于元嘉四年丁卯遠亾時淵明年已五十矣
固宜相從姑志之以示好事者

攻媿又跋宇文廷臣所藏吳彩鸞玉篇鈔云始予讀
文簫傳言吳彩鸞書唐韻事疑其不然後于汪季路
尚書家見之雖不敢必其一日可辨然亦奇矣爲之
賦詩且辨其爲陸法言切韻茲見樞密宇文公所藏

玉篇鈔則又過之是尤可寶也旣謂之鈔竊以爲如
北堂書鈔之類蓋節文耳以今玉篇驗之果然不知
舊有此鈔而書之耶抑彩鸞以意去取之耶有可用
之字而略之有非日用之字而反取之部居如今本
皆以朱字別之而三字五字止以墨書字之次序皆
不與今合皆不可致詰輒書前歲所與汪氏詩跋于
左庶來者得以覽觀今玉篇唯越本最善末題吳氏
三十一娘寫問之越人莫有知者楷法殊精豈亦彩
鸞之苗裔耶

攻媿跋唐昭宗賜禧實鈔書云張唐英著外史檣杪

王建永平四年書張琳始未有云大順初禧實爲黔南節度辟爲推官禧字唯集韻有之與喜同他未之見鄧校書名世古今姓氏書辨證引禱杙之說且曰姓書未有此氏今增入乃知姓禧而名實也又邵御史嗣堯云臨淄有泊姓又近見序齒刻錄有香姓靜姓予向于池北偶談皇華紀聞二書頗記所聞見異姓因并錄于此以廣異聞

朱竹垞云今禱杙無此條

圖繪寶鑑宋仁宗嘗畫龍樹菩薩又善畫馬徽宗宣和御墨至今流傳尤多然不聞欽宗工畫也攻媿集有恭題欽宗御畫十八學士圖云唐文皇十八學士

猶在秦府蓋武德四年也仰惟欽宗皇帝毓德青宮以仁孝恭儉聞天下手臨舊畫而又親灑宸翰以誌之誠有慕于正觀之盛云則欽宗在儲位薰習宣和之風亦攻繪事而諸書皆不載非宣獻此跋世竟無知之者矣

五月十八日

大駕還京師二十一日內閣九卿

翰詹府寺科道等衙門以喀爾喀土謝圖汗札薩克圖汗車陳汗率諸濟農那顏台吉等七旗之衆舉國內附上表賀請上尊號不許

二十一日

上御乾清門

欽選進士楊中訥

等三十一人爲庶吉士漢軍胡麟徵滿洲阿金喀爾喀與焉

監察御史江縈條奏會試事宜奉

旨與御史王

承祐前疏下九卿詹事科道再議以直隸山東爲北左河南山西陝西爲北右江南浙江爲南左江西湖廣福建廣東爲南右四川雲南爲中左廣西貴州爲中右從江請也得旨允行著於功令

吏部尚書張士甄罷總督倉場戶部右侍郎李廷松光祿寺卿金鼐罷

兵部尚書李天馥遷吏部尚書原任侍郎石文桂爲

總督倉場戶部右侍郎左通政劉楷遷光祿寺卿

國初初設兵部督捕衙門滿漢左右侍郎二人滿洲

左右理事官二人漢協理督捕太僕寺少卿二人旋

改左右理事官滿漢郎中各一人滿洲員外郎主事

若干人漢員外郎一人主事六人分理八司治八旗

逋逃及京城盜賊緝捕之事凡三營將弁之屬皆隸

焉蓋古僕區之法亦明戎政遺意也康熙辛未以三

營改隸九門提督而督捕乃專司逋逃之事矣

前太子太傅保和殿大學士兼戶部尚書致仕成克

鞏卒公大名人崇禎癸未進士卒年八十五無諡

六月初二日羣臣再疏請上尊號畱 中

前卷記唐詩人河南劉方平累代閹閹之盛按唐書

河中盧綸子姓貴盛功名著聞唐之詩人亦罕其比

綸子四人簡能簡辭弘正簡求皆有文名登進士

李衛公對

文宗云簡能字子拙司封郎中簡辭字子策歷戶兵刑三

部侍郎工刑二部尚書兼御史大夫忠武山南二軍

節度使弘正字子強歷工部侍郎戶兵二部尚書武

寧宣武二軍節度使贈右僕射簡求字子臧歷工刑

二部尚書兼御史大夫義武隴西二軍節度使太原

尹以太子太師致仕贈左僕射唯簡能不登六卿其

子知猷歷兵部侍郎戶工二部尚書右僕射太子少

師兼太師檢校司空簡求子汝弼仕後唐歷官戶部

侍郎贈兵部尚書簡求子嗣業禮部郎中其子文紀

仕後周官至中書侍郎平章事

六月十五日進呈辛未科會試錄士禎例撰後序

朝邑李瓚中黃以其父岸翁遺墨來求跋岸翁名楷

關中耆宿國初仕爲寶應知縣高才凌物爲忌者所

中罷官平生作詩文每廣坐酒酣令兩人張絹素疋

紙懸腕直書略不加點如疾雷破山怒潮穿脇移晷

而罷擲筆引滿旁若無人舉坐爲之奪氣名噪一時

亦以此坎壈失職傲然不屑也書學東坡尤善飛白
此卷皆自書雜詩中冥蒙二章如云天子傳粉墨臣
亦舞八風古人略小節其究莫能終小器易以滿如
狂彼愚蒙晉家嗜放達四郊生兵戎優孟何足爲致
身忘其崇似爲南渡甲乙時事而作關中名士予生
平交善者如三原孫豹人枝蔚韓聖秋詩華陰王無
異弘撰富平李子德因篤郃陽王幼華又旦富平曹
陸海玉珂皆一時人豪要當以岸翁爲冠

李瓚貽管夫人畫竹卷長丈餘離披錯落姿態百出
與怪石奔峭相間氣韻生動真奇作也後自題二句

云竹勢撒崩雲觸石應是瀟湘夜雨時皇慶三年秋
日作道昇下方有管氏道昇仲姬二印

湖州天聖寺壁有管
夫人畫竹或題其刻

云數枝密葉數枝疎露壓州啼秋雨餘
宋室山河多少淚畧無半點到絲絃

瓚又貽韓苑洛先生墨蹟一卷自書平陽絕句蓋四
時詞也詩云汾水春深落晚霞綠堤十里盡桃花畫
船簫鼓遊人醉漫說風流是杜家薰風綠沼碧荷香
玳宴歌兒舞袖長一醉襄陵傾百盞不知風景是平
陽姑射泉邊萬竹稠清風樓外四山秋重陽醉後歸
來晚黃菊紛紛插滿頭清曉寒霜候早朝小僮羸馬
禁天遙平陽判府催徵出棨戟重羅過豫橋自署苑

洛生稿苑洛理學經濟一代偉人而詩名不及其弟
五泉之著詩亦以人重耳

總兵官蔡元疏請修築邊牆

上命閣臣集九卿

面詢可否以聞羣臣未及對大學士伊桑阿公傳

玉音云衆志成城豈在邊牆羣臣肅然曰真大哉

王言也尋有旨不准行

前太子太傅加太子太師保和殿大學士兼禮部尚

書致仕杜立德卒公寶坻人崇禎癸未進士卒年八

十一賜諡文端

內閣以文端文毅文肅文
定等上 欽定今諡云

巡視南城監察御史阿爾賽畢興霖阮爾詢等題爲

曲全孝義以敦風化事據江南鳳陽府亳州女子王

氏告稱

云

該臣等看得王知禮卽叛案牽連李範同

之子李殿機也其母張氏給配象房校尉王福殿機

年甫三歲因冒王姓後充校尉經鑿儀衛革退賣身

鑲紅旗佛爾海佐領卜厄爾庫之家據幼聘王氏稱

年三十四歲伊叔王中凡伊兄王邁千逼嫁決志不

從探得伊夫尚存不忍卽死守婦人從一之義匍匐

千餘里外誓圖完聚此女子真有丈夫行也據厄爾

庫稱我本一窮巴牙喇價買李殿機供役復買蕭氏

配爲夫婦今重王氏節義不取伊僕身價情願斷出

又不忍拆離李殿機已配之婦并許與蕭氏同歸輕財好義此巴牙喇真有義士風也據范一魁稱年六十二歲但以異姓人攜一女子同行跡涉嫌疑事干非分因喚穩婆更番驗過已得真實處女之供是范一魁憐王氏立志尋夫不顧是非成敗護持完節似亦人情所難此皆 皇上至德深仁恩濡化洽人心風俗直媿唐虞是以女子懷貞匹夫嚮義共成一段奇緣播之海內傳之千秋知聖世貞節之風超出往昔載籍之外如此臣等查在宮人與旗人原有定例何敢越例妄請但王氏矢志守節冒死尋夫若不

准其完聚王氏無從歸着情事可憫雖據厄爾庫稱情願斷出聽其完聚然又非現行之例臣等因事關風化仰體 皇上堯舜不忍一夫一婦不得其所

至意輒敢備述上聞格外之仁均候

睿斷

云

事下

禮部議得李殿機先應役于象房後鬻身于旗下雖無放出爲民之例但亳州女子王五姐逼嫁不從千望尋夫巴牙喇厄爾庫不取李殿機併蕭氏身價情願放出爲民應將李殿機併蕭氏等准其出旗與王氏完聚仍令王氏母家給與資賂令其得所可也康熙二十八年四月二十九日奉 旨依議予山居

時于邱鈔見此疏竊歎王氏以未嫁之弱女其夫幼更患難歷三十載生死契闊不復相聞卽叔兄勸其改字亦非悖理乃崎嶇千里堅貞百折卒成其志奇哉女子真可愧世之鬚眉丈夫多矣至于厄爾庫輕財利而慕義范一魁冒不韙以全貞皆有古人之誼良史所宜大書特書者不可以無傳焉予承乏中丞時阮侍御貽以全疏刊本因節錄之

山東濟寧州民盧行之父廷輔以康熙十三年爲異母弟廷獻毆死行尚幼穉及年十五其母劉氏病不起語以父死之故令長大爲父報讐行泣涕受教時

廷獻避居金鄉縣行以孤孀未敢輕發乃僞與廷獻子阿黑和好若忘前事者廷獻信之康熙二十九年七月初八日廷獻醉卧行抽刃刺殺之自縛詣吏吏稽前案其族盧得捷盧廣居等詞證皆有左驗巡撫讞上下法司核擬照祖父母父母爲人所殺而子孫不告官司擅殺行兇人者杖六十律熱審減等笞五十奉 俞旨一時公卿士大夫無不奇行者

宋唐庚子西嶺山集二十四卷詩賦十卷雜文十二

卷

以論記傳贊銘誌狀表啓書說箴疏爲次

三國雜事二卷紹興二十一年朝奉

郎鄭康佐刊于惠州有鄭總呂榮義康佐及庚弟庚

子文若序徐渤與公鈔自何楷元子家藏本渤有序
庚自說云詩最難事也吾于他文不至蹇澀惟作詩
甚苦悲吟累日始能成篇史言名治察言諸論爲時
所稱予錄其古今詩爲二卷文賦二十二首爲一卷
雜事上下爲一卷都爲四卷庚生三蘇之鄉又前後
與東坡貶惠州而集中無一字及之蓋庚起家爲張
商英所薦其貶惠州亦以商英連染視韓子蒼異趣
宜其不爲看山之徒歟

門人莆田林禮部麟焜石來寄宋林艾山光朝林網
山亦之陳樂軒藻林虜齋希逸四先生詩鈔艾山與
朱子同時講學有重名稱南夫子官至國子祭酒集
賢殿修撰常論曾覲龍大淵不賀張說封還謝廓然
丙批其立朝大節本末如此網山其高第弟子樂軒
又網山高弟也虜齋與後村同時予曾見所著三子
口義此鈔甚略然艾山已下皆以道學相授受風雅
非所究心也艾山文鈔一卷其族孫兆珂所刻云是
鄭山齋本僅二三十篇又多表啓祭文不足見其所
長後村稱其文高迫檀弓平亦驅韓固過情之論要
是南宋一作手予昔從黃虞稷俞邵借觀全集未及
鈔錄至今抱憾集中有與王宣子舍人書云讀書如

飲啖一日不得食便如此空茶三朝五日或不近書
卷虧耗不少是真讀書人語又云海巾一山名蒼洲
隔岸視之約五七里許一水可到有千家無一人讀
書亦有田數十頃可耕可食魚米極易辦可以卜室
讀書隔絕人世無賓客書尺之擾令人髣髴想像其
處如桃花源也兆珂號博雅所著多識編宙合編檀
弓述注等書傳于世

殿試策例有規式違式輒不得與上第康熙戊辰仁
和凌紹雯少習清書殿試對策遂用清書漢書兩體
寫之讀卷官奏請 上裁置二甲之末

刑部尚書杜臻遷兵部尚書工部尚書陳廷敬遷刑
部尚書以刑部右侍郎高爾位爲工部尚書左副都
御史李迥爲刑部右侍郎

德清舉人陳述古字雲瞻著簪雲樓集記一事云慈
溪劉仲照家有老婢其曾王父幼時人也顏如五六
十許少遇道士授藥一丸吞之永無疾厄亦不記某
甲子爲生辰但憶若干歲時倭寇犯慈曾抱小郎君
避某所獲免小郎君卽仲照曾王父也從康熙戊申
逆推之已百三十八歲矣

康熙三十二年京城東田家有老嫗已百三十歲日

飲啖止水米一酒盃晝夜危坐形如嬰兒

楊龜山云齊桓公攘戎狄而封衛未嘗請命于天子而專封之也故春秋書城楚丘而不言其封衛蓋無取焉然則木瓜美桓公孔子何以取之曰木瓜之詩衛人之詩也衛爲狄所滅桓公救而封之其恩豈可忘也欲厚報之不亦宜乎在衛人之義不得不以爲美其取之也以衛人之義而已若春秋褒貶示天下之公故無取夫興滅繼絕善之大者況衛人報德之辭豈得不錄龜山以此辨詩春秋去取異同則可耳

桓公大義烏可沒耶

已下三條讀楊龜山集偶記

龜山論叔于田云仁且有禮矣而又有武焉固宜國人之所說而歸之而詩以爲不義得衆何也曰先王之迹微而理義消亾政教不明而國俗傷敗故人之好惡不足以當是非而毀譽不足以公善惡叔段不義而爲衆所說亦以衰俗好惡毀譽不當其實故也予以爲此意猶有未盡者人之賢不肖各有其黨黨羽嬖幸更相貢諛彼詎恤公論哉如淮南王之伍被左吳宸濠之李士實劉養正輩甘佐畔逆躬陷大戮此曹猶足以禮義責之乎此詩當是其黨嬖幸之屬造作以愚國人者而非其國人之愛之稱之也觀其

後公子封伐京京人叛太叔段則豈國人果悅而歸之哉

龜山論將仲子云共叔段繕甲治兵國人說而歸之而詩人以刺莊公何也曰叔段以不義得衆其失在莊公之不制其早也君明義以正衆使衆知義則雖有不義莫之與也雖有僭竊莫之助也尚何使人說而歸之哉民說而歸之則其取之也固不說矣故莊公雖以仲爲可懷而終畏人之多言也此意亦有未盡嚴華谷云說詩者探莊公之心在于殺段而託諸父母諸兄國人以爲說冀以稔成其惡耳此駁後序

未盡莊公之惡則然而說詩之本意則未也叔段舊有奪嫡之謀云及段將襲鄭公曰可矣蓋幸其釁自彼作謂人不得以議我豈有涕泣而道之之意哉此詩正以公與祭仲有殺段之謀故設爲公拒祭仲之辭以天理感動之公論開悟之耳此言深得詩意如龜山之論猶是以至誠待莊公矣

有女同車序曰刺忽之不昏于齊卒以無大國之助至于見逐云刺字殊失詩旨張南軒曰忽之不昏于齊未爲失也而詩人追恨其失大國之助者蓋見忽之弱爲甚追念其資于大國或有以自立蓋忽者先

君之世子其立也正故國人見其逐而憐其無助嚴
華谷曰突挾宋之援以逐忽故國人惜忽之無援而
作此詩曰惜曰憐得其旨矣且忽所辭之齊女乃文
姜也豈爲不智哉

李泰伯觀文章皆談經濟其本領尤在周禮一書范
文正薦之以爲著書立言有孟軻楊雄之風在北宋
歐蘇曾王間別成一家予嘗病其不能詩長夏借讀
盱江集絕句間有似義山者如王方平云五百餘年
別恨多東征重得見青蛾擗麟始擬窮歡樂不奈閑
人背痒何璧月云璧月迢迢出暮山素娥心事問應

難世間最解悲圓缺祇有方諸淚不乾梁帝云凝旒
南面總虛名廟祀何曾暫割牲但學禪心能忍辱莫
羞侯景陷臺城送僧遊廬山云行非爲客住非家此
去廬山況不遐要見南朝舊人物池中惟有白蓮花
憶錢塘江云當年乘醉舉歸帆隱隱前山日半銜好
是滿江涵返照水仙齊著淡紅衫皆有風致此集乃
正德乙亥南城令孫甫刊本有祖無擇及泰伯自序
最爲完善予家藏本差不及

新建縣令族姪懋才寄陳弘緒士業石莊集徐世溥
巨源榆溪集鈔本巨源集卽吾友陳允衡伯璣所定

別有榆墩集八卷則熊人霖伯甘所刻者夏小正解
東園類語詩話伯璣木所無二君南州看目士業之
文暢巨源之文潔觀石莊西陽藏書鈔本書二記榆
溪上虞山錢公借宋集書二君可謂真讀書人名下
故無虛士也番禺黎延祖方回亦寄其父遂球美周
蓮鬚閣集至索序美周與二君及萬時華茂先友善
巨源序美周集以太白子瞻擬之推許過情要亦崇
禎末一才士也

居易錄卷十一終

居易錄卷十二

濟南 王士禎 著

徐世溥作諸葛武侯無成論略云諸葛之出師卽周
公居東之志也其盡瘁而無成功則昭烈如其不才
卿可自取一言配之也人固有終其身若渾樸寬厚
而不能不敗露于將死斯言也昭烈之疑忌盡見生
平深險畢露非惟昭烈不知孔明孔明亦不知昭烈
甚矣彼以飛羽旣沒老宿無人嗣子冲愚而亮以良
平之才據伊周之地一旦之後有蜀者未知爲劉氏
子否也故若示以開心見誠而實豫防逆折之自取

一言猶曰蜀卿之蜀也卿欲取任自取之但勿戕吾
子云耳云予讀之駭然古來論昭烈者曰帝寬仁大
度能得人死力知人待士有高祖之風及其託孤之
際君臣肝膽相照無纖芥形迹何其盛也卽曲筆如
陳壽亦曰弘毅寬厚知人待士有高祖之風英雄之
氣及其舉國託孤于諸葛而心神無二誠君臣之至
公古今之盛軌也陳后山云昭烈謂武侯云其勤勞
一生蓋爲漢計豈爲子孫計哉乃周公之用心也論
忠武侯或曰三代以上人物或曰王佐之才或曰近
伊尹之出處或曰出師二表與伊訓說命相爲表裏

又曰勸昭烈伐劉璋而迄取之後世不以爲貪昭烈
令輔後帝曰苟不可輔公自取之孔明不以爲嫌專
國一十二年後主不以爲偏故魚水之契古今美之
不聞有異議也荀子論齊桓公云倏然知管仲之能
足以託國也是天下之大智也遂立以爲仲父是天
下之大決也昭烈有焉世溥何人而敢于污巖先賢
如此徒見其狂詩無忌憚而已薛能詩當年諸葛成
何事只合終身作臥龍後人非之及周岌之難人以
爲口業之報該聞錄云薛能從事西川每短諸葛功
業厚誣之見于詩不一而足竟不免許州之禍世溥

晚死于盜安知非口業之報哉斯論也罪浮于能矣
趙清獻公集十卷衢州舊刻本有景定陳仁玉至治
蒙古僧家奴鈞二序門人太倉進士曹延懿言相國
鄴園李公昔爲制府鎮三衢軍旅之暇訪清獻之裔
祇一農家子目不知書呼見之爲補奉祀生員居公
祠側以奉烝嘗公常有退居十詠如高齋竹軒諸遺
蹟皆不可識惟濯纓亭爲後人重建今尚存族子文
錦爲衢守予以修葺清獻祠堂及修補集板屬之
文潞公身都將相功名蓋世而其詩婉麗濃嫵絕似
西崑予向摘其佳句著之池北偶談趙清獻詩亦有

似潞公者殊不類其爲人如暖風云薄袂欲雲散輕
雲舞袖低簾疎蕩樓閣塵暗逐輪蹄絮亂垂楊道香
流種藥畦春牕惱春思一枕杜鵑啼芳草云翠密馴
文雉叢深隱畫輪離披金谷曉寂寞茂陵春古渡班
荊客長堤走馬人芊芊似袍綠一雨一番新社鵑云
響亂書牕外人驚夢枕中江城啼曉月澤國愬春風
柳道盤餐綠桃園躑躅紅年年來此地畱恨任西東
寒食云城郭青烟散郊園麗日長鬪雞紅錦翅遊騎
紫絲韁有蝶俱含粉無人不惜芳儘拚花下飲歸去
醉成鄉觀水云澄江抵練長極目路蒼茫烟芷差差

綠風荷柄柄香西流終古恨南浦鎮時忙擬待傳辭
意離人在楚鄉右數詩掩卷誦之豈復知鐵面所爲
耶

江西巡撫宋牧仲中丞寄三孔文集宋中書舍人文
仲經父禮部侍郎武仲常父金部郎中平仲毅父也
經父以范蜀公薦對策九千餘言力排安石觸其怒
罷歸常父詆王氏學毅父以不行新法爲董必所劾
安置英州皆元祐君子也史稱文仲集五十卷武仲
集百餘卷平仲有續世說珩璜新論諸書今三孔集
通僅五卷周益公序云慶元四年太守濡須王蓮訪

遺文刻之存一二于千百則三公之文在南渡之初
已多散佚今所傳五卷又非慶元之舊矣三公以氣
節重當世不甚工詩經父制科策首嚴王霸義利之
辨剴切似劉蕡其論李訓義不顧難忠不避死而惜
其情銳而氣狹志大而謀淺足破羣瞽拍肩之論常
父論唐憲宗相皇甫鏘逐裴度蓋爲安石惠卿輩而
發蝗說謂新法之害鼠說謂熙豐用事之人雞說謂
王呂之不終魯雞以喻安石蜀雞以喻惠卿也毅父
文僅表啓無可觀蓋佳處不傳多矣惜哉
牧仲寄新刻梁苑諸集故相沈文端公龍江先生亦

玉堂集公爲先太師公

諱象乾明
兵部尚書

房師是集太師所刻

凡二十八卷今本纔十卷公直方勁正有古大臣之節其文曉暢洞達根極經傳如韓魏公司馬溫公集中議復建文年號立景泰實錄疏乞停下河南取麒麟疏請建儲疏請並封恭妃疏乞宥議禮諸臣疏論戚畹鄭承憲乞恤典疏議秦府進封疏因災陳言疏請罷礦稅疏納諫疏乞免發私宅票擬疏皆關時政之大者古所謂社稷臣也

偶過慈仁寺市得琅邪王若之集若之字湘客故明戶部尚書基之孫也歷官叅議孤情絕照清談如晉人服官畱都放情山水買舟遊武林窮湖山之勝三忤奄寺罷官居金陵乙酉避亂姑孰干戈崎嶇獨載三代古鼎彝法書名畫兼兩連舳寢食與俱其答人書云正惟草莽之中當堅守一之節遂死所與遊者鄒南臯馮少墟鍾龍淵張藐姑李懋明左蘿石諸公皆一代偉人湘客詩清真無啓楨氣習最工赤牘單辭片語逼似晉宋間人絕句云素宇流孤月清光照雁聲似從千里外寄與故鄉明驢背肩似山笠下眼如海偶見漁樵人行歌互相待恰遇青山白水忽來細雨斜風俗駕還多高寄便止宿于此中若言造物

勞人那得伯師遮道清涼是大藥王一拂一濯甚好
片時眼界澄清鼻觀與之俱省脫巾解帶匡牀消受
荷花百頃圖書篋笠載輕舫雨雨風風去不停疑是
烟波垂釣者居然呼吸有樵青三十寒香透屋栽果
然林下美人來狂夫自許非寥落眷屬妻孥總是梅
聯句如風雨松堂集燈殘經不明風烟無市色時令
屬山秋半將春事負始有故人來戶外惟羅雀牀間
復鬪牛如何橫白雨忽已失青山雨餘春尚冷江上
柳初眠正是春潮長還當暮雨時登高逢九日不速
恰三人扁舟乘曉霽歸棹作浮家學語兒呼汲消閑

婦鬪茶林端秋露滴草際候蟲鳴碧藻浮沈處白蓮
三兩棧皆非凡語

京師殺牛驢者最爲殘忍予爲中丞時嘗諭五城痛
禁殺驢者而殺牛皆回回人雖以世祖章皇帝
之誠諭不能禁也一日讀李叔則河濱集愛牛說云
肉牛者十之三革牛者十之三角牛者十之四天下
於是無全牛矣爲之惻然悚然叔則古文才極橫特
未簡耳論說諸篇尤多可觀

莆田林人中字中子因其舅氏同年張給事松齡致
其先人小着蟊螟集乞序小着諱嶠明末癸未進士

以文章鳴騫越者也書云人中海陬未學藉先人緒
餘得侍巨公長者之側竊聞當今藝苑之中執牛耳
主盤匱爲詞林繁露者首推新城阮亭先生其文章
英妙足以鼓動一時其人地高華足以躡厲天下凡
世之游光揚聲者得其一言皆可附而不朽私心嚮
往久矣僻居嶺澁山川綿邈無從瞻溯龍門附灑掃
之役后山一瓣香二十年來自比白頭孝逸未嘗私
以許人也側觀史策以來文章之家吮毫濡墨仰屋
梁著書指不勝屈然求其傳也必得當時一二巨公
敘而表之然後可以行遠而垂後故以穆伯長之文

待歐公而論定徐文長之集遇中郎而始傳蓋古之
君子推崇前修鼓勵後學遇其可傳者則敘而傳之
不必盡屬其夙昔之知交亦不必盡俟其子孫之造
請也人中先人壯年筮仕夙爲溫陵銅山諸公所器
重及早歲里居與同社余賡之先生磨鏃古學杜門
著書置身簡牘以此致忌者側目亦與賡之先生同
難遺集十餘卷同鄉知言之士每以子業昌穀二公
相位置殺青已久二十年藏弄篋笥未嘗妄求玄晏
蓋追先人簡伉遺性非其意中推許之人斷不敢以
鄭重陳乞也伏念先生泰山北斗今日之所謂歐公

中郎者也而先人軾軻沉抑才不配年卽歐公中郎
之所致歎伯長文長者庶幾近之則以伯長文長之
遺集求當今之所謂歐公中郎者敘而傳之實先人
意中之所深願者也且以先生之文章聲氣遇世之
失職無聊者猶爲游光揚聲不惜獎進而羽翼之使
在當今之時有如伯長文長者其人雖往其集猶存
又重以子孫之請謁雖無夙昔之交然推其生平簡
伉不妄許可之懷一旦有子孫焉體承先志鄭重造
請當亦先生大雅所不棄也懷抱廿年不敢以疎賤
徑進謹因家舅張黃門同年之誼託爲介紹冒昧進

前懇乞鑒其區區不惜一語爲其序述實先人九京
之下所望以傳後無疑也主臣
嘉善魏哲嗣寄宋駙馬都尉王晉卿疊翠爭流圖一
卷有紹興御璽晉府書畫之印敬德堂圖書印范長
白允臨跋尾王翬石谷定爲真蹟

李叔則楷云內典如佛塔廟一句疊三實字栢梁詩
一句七果名太白詩一絕句五地名文機故用虛非
實字則不壯予觀霧堂集多發前人所未發詩文頗
奧衍聳拔有奇氣恨才多不能裁割加聲律不叶未
免拗折噪子如昔人所謔耳六月坐朝房會議偶涓

來少宗伯問霧堂集答之如此

竹垞過邸舍云近著一書曰經義存亡考以鄭夾漈
經籍志作骨而附益之不傳者存其目其傳者略論
作者之意辨其得失蓋倣西亭授經圖兼用晁公武
讀書志之例也竹垞篤好經學所錄多鄞范氏天一
閣禾中項氏及曹氏倦圃溫陵黃氏千頃堂祕本
竹垞又言近寫得彭汝礪鄱陽集洪丞相盤洲集王
炎午吾汶集程鉅夫雪樓集予因詢竹垞所見唐人
文集自韓柳元白數集外則張曲江顏魯公獨孤及
劉禹錫元結李衛公陸宣公杜牧沈亞之呂溫李觀

司空表聖皮日休陸龜蒙羅隱皇甫湜李翱孫樵劉
蛻黃滔歐陽詹二十餘家皆予所及見者若富嘉謨
吳少微李華蕭穎士賈至李翰樊宗師梁肅盧肇馮
宿劉軻之徒皆不見其全矣

陸務觀過巴東弔寇萊公有詩云人生窮達誰能料
蠟淚成堆又一時蓋以蠟淚成堆爲公貴後事耳予
讀后山談叢云萊公性豪侈自布衣夜常設燭廁間
蠟淚成堆及貴而後房無嬖幸則自其微時已然旣
爲宰相乃所謂無地起樓臺相公也此萊公英雄本
色所以不可及

予選五言七言詩及唐賢三昧集二書皆姜西溟徵君序之又選唐人選唐詩自河岳英靈已下八家益以韋莊又玄姚鉉文粹爲十種乞序于朱竹垞太史太史復書云姚氏文粹旣入選中則英華鼓吹三體衆妙聲畫正音萬首絕句諸本似不應遺顧予取吳興以其獨載樂府古調詩在五季詩道卑靡之後有復古之功非諸家所及若英華萬首取備故博而雜鼓吹三體惟錄格詩氣格卑下衆妙二妙亦然楊仲弘唐音品第略具而又多紕漏不及高氏品彙之詳審聲畫止題畫之作歲時雜詠僅節序之篇皆非文

粹比也故略論之有暇當取前諸本益以文章正宗唐人詩唐釋子弘秀集續爲一書恨安石百家選無從見之耳

陳后山云韓文黃詩有意故有工若左杜則無工矣然學左杜先由韓黃此語可爲解人道

鄒忠公浩道鄉集四十卷其子柄榘所編有李忠定公序邵文莊寶後序正德七年壬申重刊本也道鄉立朝大節在諫立劉后論章惇二事其立后疏古今仰之如泰山北斗劾章惇三疏其二云元祐之朋黨方絕後來之朋黨又熾其三云惇在元祐初詆斥先

帝保甲之法以爲非是其言甚力自陛下躬覽以來
凡語及先帝者槩從竄逐唯惇久置不問云則是薰
蕕不分且躋惇于元祐君子之列其言諄矣無怪蔡
京立黨人碑而惇倖竄名其末也先生受學程門而
特嗜禪理詩文多宗門語居衡昭時古詩時似樂天
格詩深穩與葉石林工力相敵北宋之雄也零陵有
市戶呂絢者嘗以錢二百萬造大舟以俟先生後北
歸呂以舟送至江南先生謝以五絕句云平生親友
漫紛紛有幾書來寂寞濱二十萬錢捐不惜可憐湖
外有斯人瀟湘起柁出江湖日日乾坤展畫圖白酒

紅魚對妻子鷓夷還似此行無若絢者抑何可使其
無聞哉

道鄉序括蒼易傳云先生王文公高第也三聖之所
祕文公旣發之于前文公之所略先生復申之于後
先生于斯文豈曰小補之哉則道鄉又服膺荆舒之
學其立言駁而不醇如此其曰雖居軒冕之間當有
山林之氣節義文章學術大抵皆然乃名言也又曰
范丞相忠宣公平生奏對稱引止是孝經論語孟子周易

二則見
語錄

西塘先生集九卷宋福清鄭介公俠著萬曆中其鄉

人葉文忠公向高得祕閣本刻于金陵隆興甲申公
之孫嘉正守建昌軍刊本也有黃祖舜序嘉正之孫
元清跋云乾道丁亥侍郎簡肅林公出鎮九江鏤板
郡齋淳熙改元太師左丞相史公出鎮鄉邦復取是
集親爲題跋而刊之蓋先生集南渡後凡三刻今本
乃第四刻也先生之人所謂浩然之氣至大至剛其
爲詩文亦如之大抵似石守道而無其怒張叫呶之
習有德之言仁者之勇彷彿見之古詩如古交行呈
子京等篇在樂天東野之間近體和荆公何處難忘
酒一章令奸邪九原之下猶當慙汗先生子堦卽艾

山林光朝也先生之弟侃登元祐三年李常寧榜子

汝石

按傳誌先生子一人
穎早卒此必有誤

崇寧五年蔡薺榜侃子良臣紹興

二年張九成榜汝石孫永年紹興三十年梁克家榜
椿年隆興元年木待問榜良臣子恭乾道二年蕭國
梁榜永年子牧之紹熙元年余復榜椿年子嗣之開
熙元年毛自知榜牧之子格淳祐四年畱夢炎榜終
宋之世科第不絕天之眷忠義其至哉

一拂先生少隨父遊宦金陵讀書清涼山寺深爲王
介甫所器鄱陽楊驥來學于介甫介甫命從先生學
及調光州司法叅軍讞疑獄四五事介甫在政府皆

如所請任滿入京介甫勉令試法不應又令子雱壻
黎東美諭意將辟爲修經局檢討皆力辭且曰丞相
一旦當軸發言持論無非以官爵爲先所以待天下
士亦淺矣果欲援俠而成就之取其所獻利民便物
之事行其二三使進而無愧不亦善乎介甫爲先生
第一知己而至于義利之辨不稍詭隨如此若先生
乃可以報知己矣

文昌雜錄單父龐文英著宋人說部之佳者予家有
寫本文英官禮部郎官丞相頴公之子也後山集有
贈舅氏龐大夫詩云傳家聲烈三公後貯腹平生萬

卷餘謂文英也後山爲頴公外孫又有龐謙孺字祐
甫南渡後客吳興著白蘋集見吳興掌故

后山寄山谷書云正夫有幼子明誠好文義每遇蘇
黃詩文雖半簡數字必錄藏以此失好于父幾如小
邢矣乃知向歆無足怪者正夫謂丞相挺之明誠與
婦易安居士撰金石錄后山與丞相僚壻也小邢謂
恕子居實

以順天府府尹衛旣齊爲都察院左副都御史

趙清獻集有劾陳恭公執中嬖妾殺婢二奏反復不
遺餘力予竊不謂然一日讀范蜀公疏言今陰陽不

和財匱民困盜賊滋熾獄犴充斥執中當任其咎臺省捨大責細暴揚燕私若用此爲進退是因一婢逐一相非所以明等級辨堂陛也不覺歎服如蜀公者真可以爲宰相元祐之初獨高臥不肯起其風概又出元祐諸賢之上

吾汶橐九卷安福王炎午鼎翁著炎午以生祭文丞相得名然他文乃似里社餅肆中慶弔卷軸之語晚以書干姚叅政貫學士自比干爨下之焦尾若唯恐其不已知者誌父之墓又必于當世顯者是求此數端皆所未喻集中惟張尉舊祠堂記頗佳不減羅鄂

州社壇記存此一篇足矣

洪文惠适盤洲集十三卷有詩無文按經籍志集八十卷此非其全也文惠與弟文安遵文敏邁同登館閣文名滿天下號稱三洪時朋芻炎兄弟亦稱三洪而功名爵位遠不及此集十卷以下皆挽歌樂章詩餘無足錄八卷九卷皆雜詠盤洲山水草木擬李衛公平泉諸詠紫薇云十年三雁序接翅紫薇垣史稱其家居十六年兄弟鼎立以著述吟詠自樂猶可想見其盛也其父忠宣公松漠紀聞及景伯隸釋景巖泉志景盧容齋五筆夷堅志唐人萬首絕句今皆傳

于世

盤洲集和景盧野處解嘲詩園池如此休言小但放
芻蕘雉兔行但字注平聲與徐騎省莫折紅芳樹但
知盡意看同二公皆精說文之學也

嘗讀耶律文正詩花落餘香著莫人蓋本朱淑真詞
無奈春寒著摸人語適讀宋彭器資汝礪鄱陽集有
湖湘道中見梅花絕句云滴葉開花妙入神酥盤憶
看北堂春瀟湘此日堪腸斷隨處幽香著莫人乃前
此矣唐人唯元白集中多用此等字未暇考長慶集
也經籍志汝礪集四十卷今才十二卷

世謂東坡教壞司馬君實家僕后山談叢別記一事
云參寥如洛遊獨樂園有地高亢不因枯枿生芝二
十餘本參寥謂老圃曷潤澤之老圃曰天生靈物不
假人力寥歎曰真溫公之役也合觀二事溫公之修
身齊家可見與安石在鍾山見老兵善掃地而喜一
旦誤仆燭卽大怒斥去正可互觀也

山谷云氣蒸雲夢澤波撼岳陽城不如雲中下蔡邑
林際春申君疎影橫斜水清淺暗香浮動月黃昏不
如雪後園林才半樹水邊籬落忽橫枝此論最有神
解後山詩話別記云魯直謂笙歌歸院落燈火下樓

臺不如落花遊絲白日靜鳴鳩乳燕青春深氣蒸雲
夢澤云不如光涵太虛室波動岳陽樓此語大減上

二聯雅俗判然不煩秤量下一聯孟句雄渾天成若
光涵太虛室是何等語必記者之誤非黃論也

談叢記趙元考云寒食麩臘月雪水爲糊則不蠹南
唐煮糊用黃丹王文獻公以皂莢末置書葉間然不
如也

辛未三四月京師不雨多風霾四月十八日職方督
捕員外郎郭里入署稍早至皮市忽大風起見有神
人朱衣白馬自北而南形貌甚偉風旣過從人猶見

其馬尾視郭里已擲馬下所乘馬屹立于旁問之懵
然不覺也歸病三月餘始愈

太平寰宇記□百□□卷宋樂史撰世無刊本予家
有寫本闕七十餘卷竹垞嘗借鈔之又借徐氏藏本
補足六十餘卷尚闕第四卷及百十三卷至百十九
卷僅闕十卷聞金陵焦氏有宋刻本今歸吳廬澤弘侍

郎

南昌王孫朱鬱儀謀埴博雅好古與周藩西亭相頡
頎著書至百種時卿名統錯撰古史記四十卷及詩
解頤等書予已著之皇華紀聞第二卷又有奉國將

軍隱之名謀聖號厭原山人博雅精六書之學嘗刻
薛尚功鐘鼎欵識陶南村書畫史會要及江西宗派
詩寒玉館帖又嘗參學于大通禪師亦一畸人

古來奸雄多工書如李斯趙高曹操鍾會劉曜王敦
桓溫劉裕劉毅桓元郗超朱溫之屬下至盜賊亦有
之梁虞龢論書表云盧循素善尺牘尤珍名法西南
豪士咸慕其風劇賊乃亦嫻此真可怪也戴若思亦

工書

虞又云謝靈運母劉氏子敬之甥故靈運能書而特
多王法昔人云王氏例能書謝氏例能詩予按謝氏

自文靖

庾肩吾書品
列中之上

已來尚奕萬晦敷方明靈運惠連綜

靜朧藻皆擅書名乃至道韞亦云善書知前賢未為

篤論也

謝氏蘭玉集自安石歷梁陳凡作者十六人吳興
江閩序安石移葬長興之九鷗岡見吳興堂故集

書史會要王曠導從弟與衛氏為中表故得蔡邕書
法于衛夫人以授子羲之則是右軍父子皆經衛指
授也衛授筆法于蔡琰書法之傳在二女子亦自一
奇

書史會要云彩鸞不知何許人作楷字小者至蠅頭
許有大字法書唐韻極有功近類神仙吳彩鸞慕彩
鸞故名按唐韻卽女仙吳彩鸞所書以若所云似屬

二人南村謬誤耶又云許渾不知何許人按唐詩人許渾潤州人居丁卯橋名籍最著南村草草乃如此又李北海書碑自刻之託名曰蘇靈芝乃云靈芝書生嘗爲易州刺史不知何据

廣南人以荃爲茶予頃著之皇華紀聞閩道鄉集有張糾送吳洞荃絕句云茶選修仁方破碾荃分吳洞忽當筵君謨遠矣知難作試取一瓢江水煎蓋志完遷昭平時作也又有藿薺菜詩云丹桂葉舒推重碧木蘭花發避深紅皆可入南方草木狀也李仲賓學士言交趾茶如綠苔味辛烈名之曰登或卽荃字見

研北雜志

懸榻編有神化虎記事云順治乙未春三灘人甯某鋤田次有虎搏之甯急舉鉏中其頰虎委去甯疾歸呼鄉人躡之乃入一古廟神像頰上鉏痕宛然泥汚尚濕碎視其腹得人骨甚多始知前虎神所化也遂焚其廟而虎亦絕又汀州丘舉人長厚人也年七十餘一日夢神告曰明午有五僧到門化齋可厚待之或索酒肉恣予勿靳次日晨起如其言治具亭午果有僧五人至齋之未足又出酒肉令恣食僧喜逡巡出一籍示丘曰吾嚮者試君耳人言君長者良然君

名在此籍否者厄矣遂去丘遣人尾之至林薄間五
僧皆化爲虎咆哮而去汀人危允藏言如此又樵川
黃翁密溪人生三子俱壯矣乙未使耕田山中晨出
暮返一日鄰子告翁田蕪不治翁心怪之詰旦三子
出翁密尾之見三子入山林中自褫衣挂樹化爲虎
翁大恐奔歸告其鄰拒戶匿處迨夜三子歸扣門良
久翁不敢應鄰子從室中告其故三子曰有之帝命
所驅不自由也因嗚咽呼父曰罔極之恩寧不思報
無如父命早在劫中兒輩數日遠出正求其人可代
者今事旣露不可復止某衣領中有小冊幸爲簡付

不然父固不利兒皆坐是死矣翁取燭覓衣領果得
小冊皆樵郡應傷虎者翁名在焉翁曰奈何三子曰
父第開門當自有策勉從之三子受冊泣拜告翁曰
此上帝之命父可蒙厚衣數重勿結帶加黃紙其上
匍伏虔禱兒當救父翁如其言三子次第從後躍過
各銜一衣虎吼而去遂不復返亦危說予往聞江都
兪生述方畚司土官母安順府陶生姊化虎事著之
池北紀談謂猺獠荒僻間有此事右數事皆在閩中
尤奇懸榻編南城徐芳著芳崇禎庚辰進士字仲光
亦號愚山明末曾知澤州

茅亭客話載靈池洛帶村郝醫及
利州任欄頭夫婦化虎事甚怪異

樂府拂舞歌有獨漉篇一作獨祿一作獨鹿宛委餘
編子史文選訓解云罍鹿小網也音獨鹿按古辭云
獨漉獨漉水深泥濁蓋因水邊所見以起興漉祿鹿
三字舊俱無解則作網義釋亦通

韓退之于莽鹵繆徽帖安等字多倒用皆有據非杜
撰推之玲瓏之爲瓏玲噲吟之爲宏審孟浪之爲浪
孟皆然若魯直以西巴爲巴西則趁韻耳
如何樹名九百歲一結實形如棗長五尺

華陰王弘撰無異寄其鄉王建常仲復律呂圖說二
卷蓋本諸朱蔡叅之李文利王子魚那雲路諸書而

折衷以自得之義建常居河渭之間早棄帖括以著
述自娛崑山顧炎武寧人訪之一見折服以爲吳中
所未有蓋秦士之高尚其志者予詢王少司空嶽生

承祖云建常邠州長武人

以僉都御史陳肇昌爲順天府府尹

光祿寺卿劉楷詹事府少詹事兼翰林院侍講學士
邵遠平罷

粵東洋舶有攜小鶴來自海外者高三寸長二寸許
素羽丹頂喙脰皆綠與鶴無異貯以匣中置玉盃盃
中貯清水水中浸珍珠二枚鶴立盃中竟日不食時

舍珠于喙旋吐于水開匣則振羽引吭而鳴聲極清
越長山李郎中予之客粵親見之粵西某山產小猴
如墨色亦僅長二寸許每千百相貫如懸繩下飲江
水黠者伺其飲發鳥銃擊之中斷而墜就江中取之
無一二生得者人發殺機微物失其咸若亦毒矣哉
蜀石泉猴羅江犬子亦皆以小得名荷蘭小牛白質
黑文項領間有肉峯如橐駝予爲禮部主客主事時
親見之云

辛未夏刑部李郎中斯佺市一豕將生子會李生日
近私計若是日生子則捨之否則以供食其庖人是
夜夢偉丈夫九人直入內室呵之曰吾輩將有請于
主翁耳明晨以告而豕適生子九李異之遂送之放
生池

居易錄卷十二終

人內... 曰... 曰...

